

欽定四庫全書

集部六

竹齋集

別集類五明

提要

臣等謹案竹齋集三卷續集一卷明王冕撰冕字仲章績高士傳作字元肅諸暨人本農家子家貧依沙門以居夜潛坐佛膝上映火讀書後受業於安陽韓性遂傳其學然行多詭激頗近於狂著作郎李孝光秘

欽定四庫全書

竹齋集提要

書卿泰哈布哈

案泰哈布哈原作泰不華今改正

皆嘗薦於

朝知元室將亂辭不就明太祖下婺州聞其名物色得之授諮議叅軍未幾卒宋濂為作傳載潛溪集中敘其始末甚備績高士傳以為太祖欲授以叅軍一夕卒浙江通志據以列入隱逸傳舊本亦題為元人非其實矣詩集三卷其子周所輯劉基序之續集詩及雜文一卷又附錄呂升所為王周行狀則冕女

孫之子駱居敬所輯冕天才縱逸其詩多排
奩道往之氣不可拘以常格然高視濶步落
落獨行無楊維禎等詭佞纖仄之習在元明
之間要為作者集中無絕句惟畫梅乃以絕
句題之續集所收皆自題畫梅詩也乾隆四
十六年正月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

竹齋集
提要

二

竹齋集原序

予在杭時聞會稽王元章善為詩士大夫之工詩者多稱道之恨不能識也至正甲午盜起甌括間予避地至會稽始得盡觀元章所為詩蓋直而不絞質而不俚豪而不誕奇而不恠博而不濫有忠君愛民之情去惡拔邪之志懇懇悃悃見於詞意之表非徒作也因大敬焉或語予曰詩貴自適而好為論刺無乃不可乎予應之曰詩何為而作邪虞書曰詩言志卜子夏曰詩者志之

欽定四庫全書

竹齋集原序

所之也上以風化下下以風刺上主文而譎諫言之者無罪聞之者足以戒詩果何為而作邪周天子五年一巡狩命太師陳書以觀國風使為詩者俱為清虛浮靡以吟鶯花詠月露而無關於世事王者當何所取以觀之哉詩三百篇惟頌為宗廟樂章故有美而無刺二雅為公卿大夫之言而國風多出於草茅閭巷賤夫怨女之口咸采錄而不遺也變風變雅大抵多於論刺至有直舉其事斥其人而明言之者節南山十月之交之類

是也使其有訕上之嫌仲尼不當存之以為訓後世之
論去取乃不以聖人為軌範而自私以為好惡難可以
言詩也已商書曰惟口起羞昔蘇公以謗詩速獄播斥
海外不可以不戒也曰孔子曰邦有道危言危行邦無
道危行言孫故堯有誹謗之木而秦有偶語之戮亂世
之所與也得言而不言是土瓦木石之徒也王子生聖
明之時而敢違孔子之訓而自比於土瓦木石也耶括

蒼劉基伯溫序

欽定四庫全書

竹齋集
原序

三

竹齋集傳

王冕者諸暨人七八歲時父命牧牛壟上竊入學舍聽諸生誦書聽已輒默記暮歸忘其牛來責蹊田父怒撻之已而復如初母曰兒痴如此曷不聽其所為冕因去依僧寺以居夜潛出坐佛膝上執策映長明燈讀之琅琅達旦佛像多土偶穉惡可怖冕小兒恬若不見安陽韓性聞而異之錄為弟子學遂為通儒性卒門人事冕如事性時冕父已卒即迎母入粵城就養久之母思還

欽定四庫全書

竹齋集傳

故里冕買白牛駕母車自被古冠服隨車後鄉里小兒競遮道訛笑冕亦笑著作郎李孝先數薦之府吏冕嘗曰吾有田可耕有書可讀肯朝夕抱案立庭下備奴使哉每居小樓上客至僮入報命之登乃登部使者行郡坐馬上求見拒之去去不百步冕倚樓長嘯使者聞之慙冕屢應進士舉不中歎曰此童子羞為者吾可溺是哉竟棄去買舟下東吳渡大江入淮楚歷覽名山川或遇奇才俠客譚古豪傑事即呼酒共飲慷慨悲吟人斥

為狂奴北遊大都館秘書卿泰哈布哈家薦以館職冕曰
公誠愚人哉不滿十年此中狐兔遊矣何以祿仕為即
日將南轅會其友武林盧生死灤陽唯兩女一童留燕
悵悵無所依冕知之不千里走灤陽取生遺骨且挈二
女還生家冕既歸粵復大言天下將亂時海內無事或
斥冕為妄冕曰妾人非我誰當為妾哉乃携妻孥隱於
九里山種豈頃畝粟倍之種梅花千樹桃杏居其半芋
一區薤韭各百本引水為池種魚千餘頭結茅廬三間

欽定四庫全書

竹齋集
傳

二

自題為梅花屋嘗倣周禮著書一卷坐卧自隨秘不使
人觀更深人寂輒挑燈朗誦既而撫卷曰吾未即死持
此以遇明主伊呂事業不難致也當風日佳時搯觚賦
詩千百言不休皆鵬騫海怒讀者毛髮為聳人至不為
賓主禮清譚竟日不倦食至輒食都不必辭謝善畫梅
不減楊補之求者肩背相望以繒幅短長為得米之差
人譏之冕曰吾藉是以養口體豈好為人家作畫師哉
未幾而汝潁兵起一如冕言皇帝取婺州將攻粵物色

得冕寘幕府授以詔議忝軍一夕以病死冕狀貌魁偉
美鬚髯磊落有大志不得少試以死君子惜之史官曰
予見孟宋言粵有狂生當天大雪赤足上潛嶽峯四顧
大呼曰遍天地間皆白王合成使人心膽激激便欲僊
去及入城戴大帽如篋穿曳地裊翩翩行兩袂軒翥譁
笑溢市中余甚疑其人訪識者問之即冕也冕真狂士
哉馬不愛駕不足以見其奇才冕亦類是夫金華宋濂

撰

欽定四庫全書

竹齋集
傳

三

欽定四庫全書

竹齋集卷上

明 王冕 撰

七言律詩

金陵懷古

壞墻幽迳草青青何處園林是舊京
海氣或生山背雨江潮不到石頭城
英雄消歇無人語形勢周遭夕照明
回首長干思無限水風楊柳作秋聲

建康層樓

欽定四庫全書

竹齋集
卷上

層樓危構出層霄把酒登臨客恨饒
草色不羞吳地短鴈聲空落楚天遙
江山如畫知豪傑風月無私慰寂寥
六代繁華在何處敗紅殘綠野蕭蕭

別金陵

六朝舊跡俱尋遍千古英雄一笑休
黃葉亂隨秋雨落長江空帶楚天流
樽前有客翻新調白下無人說故侯
明日西風天色好吹簫騎鶴上揚州

過昭瑞宮次韻

紅花翠竹滿江皋，依約仙山駕巨螭。
月下每聽來鶴佩，雲中時復見龍袍。
西江日薄潮聲小，北極天開王氣高。
咫尺山河移版籍，書生徒爾說英豪。

金屋無人玉殿開，青蒲埋沒遍莓苔。
舊愁隱隱隨烟浪，新恨綿綿入草萊。
紅葉已隨流水去，黃門空憶看華來。
東南富貴消磨盡，留得荒村古將臺。

悼達兼善平章

出師未復身先死，忠義如公更不多。
豈直文章驚宇宙，

欽定四庫全書

竹齋集
卷上

二

尚餘威武振山河，中原正想劉安世。
南海空思馬伏波，老我未能操史筆。
懷思時復動哀歌。

寄天台丁仲容

去年脚底生蠱瘤，今年中華髮稠讀書不敢畧。
字過得酒，豈徒成醉休。關山杳杳絕飛鳥，
江海淒淒無釣舟。好風良夜那可已，
思君時復一登樓。

發古塘

秋風籬落菊花黃，滿眼江山似故鄉。
投老無家真可笑，長

年為客尚能狂青苔蝕盡床頭劍白日消磨鏡裏霜聞
道中州凋弊甚忘機不解說淒涼

徐竹隱

連江修竹靜郊居門外陰陰千畝餘直節不移高士操
息交那與俗人書卧聽翠雨飛瓠瓠笑挹清風過綺疏
却掃紅塵喧境寂歲寒分席待樵漁

聽秋軒

人世紅塵高沒馬老禪方丈足清幽入門便覺氣候別
歷耳似知天地秋不羨書生能作賦却憐遊子太多愁
夜來樹影飄零盡明月無端生屋頭

送邊伯京之閩

邊郎辟掾南閩去馬首春光正十分路夾海棠行錦障
江涵山翠擁羅文簡書可勵風雲會韜畧能夷虎豹羣
若向武夷山下過為余傳語杜徵君

漫興

隱几看山與世違當門種竹亦無機五更驟雨隨風過

滿眼落花如雪飛每為註書消夜燭亦常沽酒點春衣
今朝急報任公子昨日蒼苔滿釣磯

中天積翠鬱層陰雪瀑遙飛落遠岑白月夜分雙鶴舞
清風時聽萬松吟放懷儘可從詩酒行樂何須論古今
我欲與君飛兩鳥題詩刻竹滿山林

風花片片落瑤臺江北江南春未回老子胸中自瀟灑
故鄉何處却徘徊海雲挾雨連天黑江鶴如人近屋來
景物相看只如此沽盃且放好懷開

欽定四庫全書

竹齋集
卷上

四

寄東憐唐彥常

桐木散陰隣屋壁子居巷東我巷西繡衣耀日輕拂袂
白馬躡雲新鑿蹄湖上笑歌多載酒夜來歸去醉如泥
春風又別四十日安得看山同杖藜

漫興三首

白霧黃煙慘百蠻長年不見鶴書還江河萬里歸滄海
山嶺千重走劍關白首詞臣空墮淚青春才子強回顏
舊愁新恨知多少都在閒花野草間

關中險固憑三輔隴右勾連接四川簇簇樓臺懸日月
盈盈花草爛雲烟颺回海上沙飛雪雨足江南水拍天
可笑華山陳處士風流文采却貪眠
青山隱隱帶灤河金碧光中望馭娑五穀不生羊馬盛
二儀殊候雪霜多打圍陣合穹廬轉警蹕聲傳御駕過
渺渺黃沙天萬里壯心未解說風波

悼止齋王先生

休致歸來與世違平生所有未全施
胸中經緯天人識
舌底風雷宰相知
論道端然見周召
得時元不下皋夔
南金東箭誰堪擬
綠水青山盡可悲

欽定四庫全書

竹齋集
卷上

五

文采風流今已矣
夫何能見紫芝眉
中天氣黯星河慘
南國春寒草木悲
政事堂堂傳兩省
論談亶亶動諸司
老成如此多關係
青瑣諸公淚亦垂
三月燕山聽子規
追思令我淚垂垂
雖然事業能經世
可惜文章未際時
霜慘晴牕琴獨冷
月明秋水劍雙悲
山河萬里人情別
回首春風說向誰

即事

灤水城頭六月霜東華門外草皆黃
旌旗影動千官慘斧鉞光沈萬馬忙
青象不將傳國璽紫駝只引舊壇房
諸郎不解風塵惡爭指紅門入建章

白草黃沙野色分古今愁恨滿乾坤
飛鴻點點來邊塞寒雪紛紛落薊門
風景淒涼只如此人情澆薄復何論
知機可有桑乾水未入滄溟早自渾

紀夢

欽定四庫全書

竹齋集
卷上

六

十有一月三十夜清夢忽然歸到家
對母徐徐言世事呼兒故故問生涯
庭前修竹不改色溪上老梅都是花
起坐山窓聽茶鼎又思風雨客三巴

會友

昨夜朔風吹地動起看長劍雪花明
讀書空墮英雄淚得酒時澆磊塊情
相見抵須言客况論交殊不愧前盟
漢家四海承平久何必區區論賈生

過漁浦

十八里河船不行江頭日日問潮生未同待詔于金馬
却異看花在錦城萬里春風歸思好四更寒雨一燈明
故人湖海襟懷古能話舊時鷗鷺盟

即景

江北春深野草芳江南春淺柳枝黃
鳧鷖得水競出沒寒雀受風相頡頏
適意漫提如意舞醒時不異醉時狂
昨朝孺子攔街笑笑殺人間馬子長

送宇文子貞

欽定四庫全書

竹齋集
卷上

七

郊居暫輟簿書勞尚植忠良翊聖朝
風月一壇光灑灑天人三策錦飄飄
清聲足重江湖望直筆寧辭館閣招
洛下諸郎競才俊豈能無意說漁樵

次韻

老吾蘧落忘機久江湖鷗鳥弗猜疑
黃花園宅如元亮白雪滿床無子期
身後虛名定何益世間多事不須知
故人有約來招隱莫待秋風老桂枝

野人住處無車馬門外蓬蒿抵樹高
石脚雲生三伏雨

屋頭松撼五更濤
田園入畫真堪笑
薪水供厨祇自勞
匣底豪曹苔欲滿
夜來忽作老龍號

雨中遣興

黯黯陰陰沒大荒
觸髅無語劍生鏗
青山有夢客千里
明月故人天一方
鹿走平原沙莽莽
龍飛滄海雨浪浪
相望多少相思意
倚徧危樓尚慨慷

故人何日是歸年
又聽剛風洗瘴煙
驕馬北馳沙似雪
冥鴻南去水如天
莫愁絃絕蒲萄館
且喜歌生穰稬田

欽定四庫全書

竹齋集
卷上

八

好在岳陽樓上望
洞庭明月正嬋娟

雪後

今日登高不見山
乾坤混混太清寒
舊時月色無人識
新歲梅花正好看
多苦將軍居塞北
更憐羈客在長安
老夫欲語不忍語
倚徧危樓十二闌

滿目青山軒

滿目青山似畫圖
道人於此即安居
不知世上功名好
但覺門前車馬踈
風月四時同笑傲
乾坤千古一蘧廬

我生亦有林泉癖欲老衡茅愧不如

次韻

生民日日嘆零丁惟聽中朝說太平萬里江山雲莽蕩
五更風雨劍悲鳴桓溫豈解知王猛徐庶從來識孔明
簫管莫吹關塞曲野花閒草不勝情

竹西軒

青山隱隱帶江流江上軒牕面面幽來客不辭三徑雨
乘涼常得四時秋青天影動朝陽鳳落月光移隔水樓

欽定四庫全書

竹齋集
卷上

九

夜半夢回環珮響却疑歌吹在揚州

江月樓

永嘉城郭如斗樣魁峰蘭若倚青霄江空月色上樓白
風挾海聲連地搖高僧居此興不淺閒客登臨思亦饒
我欲與君飛舞去更呼仙子共吹簫

林壑亭

會稽林壑東南勝結構新亭亦壯哉樹密不知雲出沒
山深常聽水喧豗清幽可許漁樵隱游賞豈無王謝來

我欲題詩追李杜風流不是出羣才

送僧歸闕

九月三吳樹葉紅闕中渾未覺秋風上人忽動鄉關念
對客莫辭途路窮白髮豈無諸老在青山還與舊時同
到家檢點經行處應喜庭松雨露濃

秋晚即事

十年湖海挾飛仙今日憑高思杳然關北又添三尺雪
江南別是一般天紫髯老將懸清夢白面兒郎減少年

欽定四庫全書

竹齋集
卷上

說與南陽諸葛道草廬雖好莫貪眠

有懷

故人零落各山河觸景其如感慨何劍槩風生秋氣重
琴床月墮夜涼多傾杯且得孤懷壯覽鏡那愁兩鬢皤
擾擾黃塵車馬客不知留意在南柯

客興

鶴鳴猿嘯近如何客裏枯衣結薜蘿峽石卧雲山氣重
江風翻雨樹聲多狂夫對酒評秦法野老敲檀和楚歌

誰似酸齋弄竒崛好詩和夢寫漁蓑

懷古

浮雲漠漠水搖天乳燕翻飛落野田軒冕盡知為上客
衣冠誰解說前賢閉門種菜殊無策坐石看松不記年
世事東風吹馬耳錦帆金谷已茫然

下直沽

拍河健櫓比長驅百尺飛帆下直沽浩浩碧天秋氣肅
堂堂明月夜窻虛旌旗兩岬蘆花影鞞鼓三聲海浪趨

欽定四庫全書

竹齋集
卷上

轉首狂歌望西北淡煙荒草是幽都

登竺峯

健步攀緣上碧峯方知絕頂路歧通一生如在九霄上
萬景都歸兩目中老鶴獨翻珠草露孤猿嘯落桂花風
青箱家世君休問江左于今事不同

過武塘

青衫閑轉雲間路河水分流過武塘客路慣經風雨惡
詩情不減少年狂魚鹽市井三吳俗番島舟航十丈檣

楊柳連堤鵝鴨聚家家茅屋似淮鄉

懷古

會稽岩壑今猶古王謝經行何所之感慨令人有餘思
風流異代不同時春來野水生蒲柳雨過空山長蒺藜
異代無人知禹穴游人來往到今疑

雲門山圖

十年不到雲門寺忽見若耶溪上山落葉不隨流水去
長松只在白雲間當年王謝已寂寞終古林泉更往還

欽定四庫全書

竹齋集
卷上

十三

所喜二靈多道氣扶藜時復叩柴關

寄吳道子

三月不見吳道子十日兩渡錢塘江詩書壓架自足樂
風月滿壇誰敢降菖蒲青青繞石壁薜荔密密緣山牕
歸來不道簿書急漫對阿戎言老龐

看山

昨朝問竹城西去今日看山湖上來酌醪數斗且盡醉
好景百年能幾回野草散光搖翠浪風花移色閃蒼苔

飛流最是東南急乘興無辭杖履陪

異鄉

東山西山生白雲異鄉那忍見殘春野蒿得雨長過樹
海燕隔花輕笑人每是閉門疎世事何曾借酒惱比鄰
過從時有相嗔怪不解潛夫意思真

寄恢長老

眼底紛紛涸轍魚道人過地即安居瓦盃香軟雕胡飯
松兒晴翻貝葉書老到世情渾脫略年來生計亦蕭疎

欽定四庫全書

竹齋集
卷上

十三

相逢休論當時事我亦西郊結草廬

雨中

江南江北水滔天羈客相逢亦可憐坐覺青山沈席底
行驚白浪上牕前鶉鳩銜草栖危塔鷗瀟飛波浴敗船
轉首百蠻寥落甚絕無茅屋起炊煙

送噩長老

張公洞口雲翻海揚子江頭雪打毬君去興懷殊不惡
我行風雨奈何愁疎狂久負劉伶榼飄薄空餘季子裘

直待明年二三月看花騎馬過中州

庚辰元旦

試題春帖紀新年靄靄青雲起硯田展卷不知山是畫
舉頭恰喜屋如船梅花雪後開無數揚柳風前困欲眠
悵望關河無限恨呼兒沽酒且陶然

立春日

葭吹六管動飛灰便覺春從地底回草木一時生意動
關河萬里凍雲開寧須生菜傳纖手且引春風入瓦杯

欽定四庫全書

竹齋集
卷上

四

天北天南問音信故人何處寄寒梅

九日書懷

玉露霏涼木漸醅每逢佳節惜年華青山疊疊多歸夢
白髮蕭蕭不在家觸景漫思千古事無錢空對一籬花
相知相見情何已石鼎山泉且煮茶

秋興

萬里山河一局棋曠懷百感獨傷悲石麟夜雨生新恨
銅雀春風屬舊時雪捲流沙馱信遠天沈遼海鶴書遲

五陵年少俱零落回首故園空夢思
擊鼓嘈嘈夜撼山霓裳歌舞出人間雲圍環珮沈斜谷
風斂旌旗入劍關躩鑠野翁掀雉尾跳跄山鬼覲龍顏
書生豪放成何事徒步歸來供奉班

水竹居

小橋流水路縈紆竹裏茅茨是隱居慷慨不同時俗輩
清高多讀古人書好山入屋情無限明月穿簾興有餘
我亦山陰舊溪曲一庭瀟洒正相如

欽定四庫全書

竹齋集
卷上

十五

送本中上人

上人飛錫何方去笑指東南咫尺間黃葉落時行細路
白雲生處看青山欲求古道殊難得悵望高風或可攀
朋舊相逢還道我梅花清苦鬢斑斑

太平興國寺鎖翠軒

當軒種竹一萬箇清陰滿林生綠苔六月不知天氣熱
長年只覺雨聲來豈惟鳳鳥不食實又見龍孫漸脫胎
計我歲寒為伴侶屋頭更着幾株梅

答客問

人間塵土苦囂煩
林下風生六月寒
夜半酒醒方脫屐
日高眠起不簪冠
笑看游蟻巡危磴
靜聽閒花落古壇
老我自無軒冕意
尋常豈是傲時官

過殯陵

泥馬南飛王氣消
大梁昌運委蓬蒿
兩宮旒冕沈沙漠
三國旌旗接羽毛
衛下將軍尚頗牧
關中丞相失蕭曹
東南多有青松樹
爭奈春風種不牢

欽定四庫全書

竹齋集
卷上

十六

次荅王敬助

東書歸住水南村
且把犁鋤教子孫
壘石旋成蒸藥竈
插籬將就種瓜園
談揮麈尾風生座
醉倒壚頭月滿軒
富貴功名只如此
何須多夢過侯門

聽雪軒

飛來便與雨聲別
坐久甚憂天下寒
清極自然梅有韻
夜闌却喜竹平安
洛陽處士門深閉
剡曲先生琴不彈
想在此時情思好
煮茶可笑老陶酸

次韻全忠齋

十年孤影寄天涯
冷笑傍人論左車
白雪陽春應有價
清風明月不須賒
文游漸喜詩成壘
定省惟憑夢到家
休道焰光推不出
却愁燒殺杏園花

偶成

青山綠水從人愛
野鶴孤雲與我同
所適不須論醜好
相逢漫爾說英雄
樂游花木蕭蕭雨
梓澤亭臺淡淡風
興廢故無今昔異
幾回搔首月明中

欽定四庫全書

竹齋集
卷上

十一

二月江亭野色明
楊花飛散雪盈盈
鹽煙半入海氣白
風雨忽來溪樹鳴
離思厭聽孤語燕
客情無奈亂山青
明朝又上長安道
却望咸陽舊帝京

湖上書所見

東南富貴是神仙
日日西湖坐畫船
繡帽擁雲籠翠羽
紫牙宣響出紅蓮
香風宛轉珠簾動
纖手親傳玉鱸鮮
最是好情消不得
醉按花片撒金錢

送頤上人歸日本

上人住近扶桑國我家亦在蓬萊五洪濤逼屋作山立
白雲遶床如水流問信不知誰是客多時忘却故園秋
明朝相別思無限萬里海天飛白鷗

送欽上人

石頭城下五更秋高掛雲帆得順流
錢甕緣江即東府
璚花隔岸是揚州作家相見本無語
在客別離殊有愁
後夜相思好明月老夫乘興獨登樓

答賈太初

欽定四庫全書

竹齋集
卷上

知己相逢貧亦好去家未久夢來多
讀書萬卷今何有

美酒數杯顏已酡越上山移新得信

壬午年六月二十七日會稽有山移

三五江南秋老漫奔波故人割俸情何厚
白粲赤松從

我過

送僧歸中竺

天香閣上風如水千歲岩前雲似苔
明月不期穿樹出
老夫曾此聽猿來相違五載無書寄
却憶三生有夢回
鄉曲故人憑問信孤山梅樹幾番開

過京口

瓜洲正對西津渡金山焦山江水中過客放船忘險阻
何人擊楫問英雄白雲渺渺生秋樹黃葉蕭蕭落晚風
甕城頭一登眺天南天北思無窮

次王元之武平寺詩

官居正與僧居近乘興何妨日日來因向林泉得幽致
竟忘塵世有炎埃松雲隱隱當牕戶花露漙漙下石苔
對景令人重懷古海天秋盡鶴飛回

欽定四庫全書

竹齋集
卷上

十九

玄真觀

青岡直上玄真觀即是人間小洞天花石掩光龍吐氣
芝田散彩玉生煙莓苔滿路綴行屐楊柳夾堤維釣船
仙客相逢更瀟洒煮茶燒竹夜談玄

過滄江

空江五更潮水生櫓搖一舸隨潮行蘆花旋風作雪舞
水氣上天侵月明白髮不禁游子興青山忽動異鄉情
天涯淪落何多幸賴有故人如弟兄

與王德強

阿伯遷官之五羊嚴尊習隱水南莊人生出處故有分
世道如斯徒自忙笑我漂流雙鬢雪羨君奔走滿靴霜
功名固是男兒志何日歸來綠野堂

松風閣次韻

金雞峰下松風閣記得前年五月登得興不辭行曲折
乘涼直上最高層石林過雨水爭出溪谷轉風雲亂騰
休問當時有王謝風流何似竹間僧

欽定四庫全書

竹齋集
卷上

十

過徐州洪至豐沛作

落月蒼涼野色迷過洪忽聽五更雞河流東海奔騰去
天近中原漸覺低敗壘有基栖碧草古臺無石墮青泥
漢家住處人能識只在豐南沛水西

新店道中

黃桑葉落鴈聲號野鼠蹲沙北馬驕萬里山河秋渺渺
一天風雨夜蕭蕭客懷到此何由壯酒興於人自覺饒
早起梳頭對明鏡不愁雙鬢雪飄飄

即看白鴈向南飛又見黃花落短籬河道便風容易上
客程過聞信難期新霜颯颯吹楊柳野老離離和竹枝
欲飲一樽難強進且留清興漫題詩

楚漢兩城

北城有雞鳴臺高
阜者乃鄧公墓也

楚漢英雄今寂寞兩城相倚舊封疆荒臺落日酣紅葉
古墓秋風老白楊豈是有為增感慨便令無事亦淒涼
徘徊望盡東南地蘆葦蕭蕭野水黃

次韻

欽定四庫全書

竹齋集
卷上

十一

林宗出去滿巾雨蘇老歸來兩屐泥懷古令人時默默
感時於我獨棲棲春風水竹連公館落日烟華繞相堤
景物紛紛底須論首陽高義只夷齊

寄張貞居

句曲山人毛髮古蒼精龍珮羽衣輕道高不授中黃
天下皆傳外史名石菌雲融丹氣擁玉壺春艷紫霞生
樓居又近林和靖約我尋梅取次行

曲江春望圖

蒼牙隱隱出層霄飛閣聯楹滿翠濤花夾御城紅霧重
春移仙仗彩雲高天家日月無私照聖主山河不動搖
正是太平文物盛玉笙金管進蒲萄

謝林彥廣惠酒

江南三月春始足桃花杏花參差開溪雲入屋夜生雨
山瀑近牀晴隱雷讀書弔古有何益行道濟時無此才
多謝奎章老文伯時時携酒草堂來

濟川阻雪九月二十七日客况

欽定四庫全書

竹齋集
卷上

十一

九月中原柳未枯北風吹雪忽模糊瑯林玉樹連天去
綠水青山望欲無多喜夜光生錦帳不傳清響到金鋪
老夫且作梅花夢分付長年酒漫沽

濟州城南寒雪飛濟州城北凍成圍客情自古不稱意
世事于今轉覺非白馬少年頻喚酒黑紗老婦泣無衣
逢郵不寄江南信却上高樓望鴈歸

滕州濟州山不多平林大野少人家解貂且問將軍酒
對雪誰言學士茶直北五更聞玉笛江南十月老梅花

相逢休說淒涼事湖海諸郎髣髴未華
黃河西下水多生滕州徐州田不耕農民盡逐魚鱉去
商賈只憑舟楫行青山峩峩出魯國白雲滾滾來任城
浪遊欲盡燕雲道尚欠南風幾日程

季扎墓

識君因讀春秋傳今日墳前見斷碑大義可令吳俗變
高風不獨魯人知劍光注壑生靈草樹影懸空動羽旗
休問姑蘇舊風景白煙青雨黍離離

欽定四庫全書

竹齋集
卷上

二十三

臨清阻雪

海氣排空雲塞山北來飛雪苦多寒柳條搥雪枝枝重
衣帶緣愁故故寬客路何時無跋涉世情隨處有艱難
濮州城外臨清縣今夜留船得夢安

一片雪飛寒較多即看漫地却如何競傳暎體須燕玉
誰肯停杯慰楚娥直北大風山欲倒江南無凍水生羅
臨清不是長安道時聽凌空響玉珂

次韻答崔元初

樓居依約近蓬萊每見天官簇仗來
星繞紫微雙闕近日臨仙掌五雲開
旌旗影動黃金表龍馬風生白玉臺
遙望上林花隱隱乾坤清氣一時回

閒題

樓臺矗矗帶山河金玉重重是帝家
雲合紫駝開虎帳天連青草入龍沙
春風小殿看飛燕夜雨重城散落花
甲乙流蘇仙夢好莫教方士問丹砂

題趙松雪關北小景圖

欽定四庫全書

竹齋集
卷上

十四

小草叢叢出淺沙坐歌無奈畫圖何
長藤掛樹春風少老石斂雲秋色多
客子淡然忘歲月王孫徒爾憶山河
荒烟落日居庸道幾見羶車白馬馱

都城暮春

繡房香幄紫駝車隊馬連雲擁醉娥
天上柳花隨處滾人間春色已無多
風流漫聽黃金縷慷慨誰知白石歌
江北江南嘆愁絕落紅如雨打漁蓑

送僧游五臺

南國看雲故有愁燕山那忍送君游天風五月能生雪
野氣四時渾似秋適興何須窮險絕忘機不必論公侯
歸來着我門前過莫把羈懷對白鷗

莫處士悼詩

樂閒處士老西河花竹亭臺野趣多不為功名移志節
每因興感費吟哦義風孝行知誰礙山色湖光奈爾何
轉首棲霞清夢遠令人懷感動悲歌

送王克敏之安豐錄事

欽定四庫全書

竹齋集
卷上

三五

丹墀對策三千字金榜題名五色春聖上喜迎新進士
民間應得好官人江花繞屋廳事近烟樹連城野趣真
所願堂堂盡忠孝毋勞滾滾役風塵

揚州成元章居竹軒

老夫住近山陰曲萬竹中間一草堂開徑不曾防俗客
讀書恰是得清涼好風時時動環珮明月翩翩來鳳凰
正與諸君軒子近可能携酒共徜徉

山水圖

雲氣籠陰隔荔蘿吾家曾住石南坡秋風遶屋樹聲雜
夜雨落山溪水多每有漁樵共談笑且無車馬得經過
京師沙土眯人目為爾傳圖情奈何

水竹亭

韓家亭子能瀟洒流水濺濺竹四圍清淨豈惟塵不到
深幽真與世相違涼飈激韻青雲動白月流光翠羽飛
安得時時携美酒與君談笑看雲歸

重午次韻敬常葉公

欽定四庫全書

竹齋集
卷上

三

故園一望海天長京國相看嘆老蒼太學故知韓子重
高陽應笑酈生狂四更風雨客懷壯五月幽燕地氣涼
况是天家賜衣節不妨談笑引壺觴

危太樸奉使求史館遺書於河南江西歷四明
會葉君敬常借船過東湖訪古跡其樂好事
者畫之太樸命之曰借船圖復自敘以記之
葉君敬常作詩太樸和今勒諸石時賢從而
題之余亦為之贊

樓觀重重錦綉扶東湖風景即蓬壺海雲入樹青山小
野水滔天白鳥孤學士借來船似屋書生歸去畫成圖
老夫一見何瀟洒涼雨滿堤生綠蒲

金水河春興

神州何處見繁華儘好當時富貴家慷慨喚來黃字酒
丁寧將出紫簾車春風嫋嫋穿楊柳小雨冥冥度杏花
沈醉歸來不知夜又傳清響按琵琶

金水河邊柳色新玉山館外少沙塵琵琶未必能愁客

欽定四庫全書

竹齋集
卷上

二十七

鸚鵡如何錯喚人翠袖錦襜馱白馬落花飛絮闌朱輪
人間天上無多路只隔紅門別是春

劉商觀奕圖石刻本

碁畔樵人斧柯爛正與劉商舊畫同粉墨消磨彫刻在
神仙飄忽有無中青霞惟見兩童子白髮吾鄰四老翁
休把閒心動機事只宜高卧聽松風

金水河

金水河從金口來龍光清澈淨無埃流歸天上不多路

肯許人間用一杯楊柳青融春霧擁芙蓉秋霽錦帆開
老夫白髮少年志適興時來看一回

南城懷古

日上高城望大荒西山東海氣茫茫銅駝踪跡埋荒草
元菟風塵識戰場禮樂可知新制度山河誰問舊封疆
書生慷慨何多感轉憶輪臺漢武皇

青山連壁是居庸古北漁陽一線通人物盡隨風土變
川原須是古今同淡煙著柳金溝暗小雨飛花玉殿空
昨夜角聲吹不起老烏啼過建章宮

欽定四庫全書

竹齋集
卷上

二十八

讀史

耿耿青燈照青史坐看興廢眼前來亡秦未必非胡亥
滅趙終然是郭開三國英雄由將相六朝人物只嬰孩
商之孫子寧無論妲己端端是禍胎

題王有恒山房

人世紅塵漲碧空辟窻蘿几自清風朝來爽氣歸書潤
夜靜青雲入夢濃壁上枯桐忘歲月床頭老劍識英雄

丈夫要看好山色不是關中即洛中

送日侍者游兩府兼柬丁仲容先生

知君汗漫饒清興東府西州路不多牛斗正臨吳分野
城池還帶舊山河春風揚子江頭去夜月茅山石畔過
若見金陵丁處士問言歸興近如何

隱居偶成

幾日不見青山面今日青山樹色多風花落水似濯錦
野鳥隔簾如唱歌年老無成真可笑世情不合奈之何

欽定四庫全書

竹齋集
卷上

五

柴門本自無車馬昏曉時聞響玉珂

次申屠子迪韻

紅塵車馬事紛紛高眼何曾有見聞竹屋夜深時聽雨
石床秋冷不生雲歸來每愛陶彭澤漂泊誰憐鄭廣文
門徑年年芳草綠擬將茲意問東君

即事

五色雲開見太平九天風露一時清燕雀飛飛自得樂
草木欣欣俱向滎渭川何時起尚父宣室安能召賈生

田間野老罷癯甚忍死願觀風化成

有感

昨夜秋風吹草堂客中氣象太淒涼
飢來一字不可煮虛過半生徒爾狂
親老每慚疎菽水兒癡安忍誑灰囊
孤桐破碎崩緱脫坐對夕陽歌慨慷

偶成七首

人言粟里是吾家問信東臯事已訛
殘歲都聞呼盜賊良宵誰復望星河
門迎野水垂楊柳屋枕雲山帶荔蘿

欽定四庫全書

竹齋集
卷上

三

沽酒陶情作閒夢豈知冰凍合滹沱

萬里長山走薊門
斬然天險路中分
高風吹雨作飛雪
老樹積煙成凍雲
武帳駐兵談亞父
羶城無語及昭君
夜深誰渡桑乾水
嗚咽笳聲不忍聞

山郭方迎五日春
飛飛風雪欲愁人
老年作客殊無策
適興吟詩似有神
溪上梅花誰可共
天涯鷗鳥漫相親
酒闌細看柴桑論
始覺桃源不避秦

雲消巫峽蜀波來
天近崆峒北斗回
人事故於今日別

梅花却勝去年開好遊不負青春約得意那愁白髮催
行旅居家無異致開懷且覆掌中杯

去年今日雨瀟瀟今日天晴雪尚消杖履誰來看花柳
江湖何處得漁樵徒叨食飲居安土未有功勞補聖朝
入夜遙遙瞻北斗紫雲團蓋上青霄

玉漏無聲落草廬荒村遙夜石燈孤開門探雪三尺許
舉眼看山一寸無誰閔將軍窮窟穴空多公子夢甞能
老吾不作功名想只欲扁舟泛五湖

欽定四庫全書

竹齋集
卷上

三十一

出門無侶杖藜輕溪上梅花相笑迎獨鶴遠從天際下
老夫如在畫中行千峰日出流雲氣萬壑松鳴雜水聲
巾袂不知蒼翠重看山直過越王城

送五臺長老

我有慈親年老已便欲送君難遠行道邊持草或解意
天外見雲無限情九堰潮平船過穩五臺海近月多明
故人若見煩相問頭髮于今白幾莖

寄題梅

山中昨夜雪三尺牕前梅花參差開卧看枝上月初滿
夢到江南春已回可笑阿嬌佇金屋却憐姑射下瑤臺
故人知我有清興携取雙魚斗酒來

寄陸高士

山陰道士久不見無奈秋天風雨何疇昔燒丹曾化鶴
近來書字不因鵝黃花開到東籬下白日何妨拄杖過
更約登高成浩飲得詩還勝去年多

清明後日

旅遊忽過清明節百感中來與願違楊柳亭臺春寂寂
杏花村落雨霏霏青山對面人何在白髮倚門身未歸
薄暮登高重惆悵豈因蕭颯故山薇

三茅觀

層巒開徑隱空青勃窣槃跚眼力生蘿磴癡嵐留宿雨
石林寒竹動秋聲城隍下瞰紅塵海樓閣高懸白玉京
夜靜何人吹鳳管碧桃千樹月華明

悼白雲

濁世儒名多浪得先生高隱冠當今註書已發程朱蘊
講道重明孔孟心白日山林增氣象清風江海振希音
少微一隕天為黑望入東南淚滿襟

送人北上

早買北關門外船載書應上九重天風雲步武君可羨
世事乖違吾獨憐黃閣大官歸厚祿紅樓美酒不多錢
逢人可話江南景春水流花滿石田

湖上閒步

欽定四庫全書
竹齋集
卷上
三
斷雲零亂雨初晴古客遊行眼倍明可喜一湖揚柳色
不禁三月杜鵑聲青山歷歷添新寺白塔亭亭枕舊京
回首東南重淒感豈因興廢獨闕情

喜白髮

眉間黃色未為奇好是梳頭滿面絲從古其誰能脫略
於今得此可愉怡絕憐雪色照明鏡更喜霜花襯接離
萬事為他最公道老來鑷白是兒癡

秋夜偶成

風雷不改舊山河華屋年深蔓綠蘿龍柱雲消金氣冷
鳳臺人去月明多英雄空聽生銅吼感慨誰知白石歌
轉首五湖秋水濶且將閒興寄漁蓑

露華泥泥濕桐絲漸覺新涼襲弊幃肯羨輕生歸馬革
獨憐清苦卧牛衣種桃未必全忘世采藥終然會息機
欲問夷齊何處所西風吹殺首陽薇

生憎塵俗苦相侵漸漸移家入遠林但得甕中多白酒
何須囊裏有黃金關山夜靜砧聲慘淮海秋高雁影沈

欽定四庫全書

竹齋集
卷上

三十四

底事懷人作癡坐短檠花冷石房深

孤雲杳杳雁聲寒黃葉蕭蕭詩思慳坐對酒樽懷北海
嘯歌白石向南山菊花野雨家何處蓴老秋風客未還
梁甫不吟君莫問卧龍寂寞草廬閒

冉冉新霜上鬢毛相逢何事論英豪山城雨重鐘聲短
海國風清劍氣高且自草衣同牧豎不須驄馬列官曹
古來勲業真堪笑三士殺身爭二桃

瀟瀟寒雨滿江樓底事無端生百憂鐵硯磨穿燈火夜

貂裘敝盡風霜秋五更空自聽雞舞四海有誰持犗鉤
可羨當時張許輩蒲萄宮裏爛羊頭

九里山中

荒苔叢篠路縈迴繞澗新栽百樹梅花落不隨流水去
鶴飛常帶白雲來買山自得居山趣處世渾無濟世才
昨夜月明天似水嘯歌行上讀書臺

九里先生兩鬢皤今年貧勝去年多敝衣無絮愁風勁
破屋牽蘿奈雨何數畝荳苗當夏死一畦蘆穉入秋瘥

欽定四庫全書

竹齋集
卷上

十五

相知相見無他論笑看山前白鳥過
九里溪頭晚雨晴松風瑟瑟水泠泠絕無過客問竒字
只有閒雲到野亭每笑盛名傳坎壈豈陳虛語說零丁
老年恰喜精神爽合得仙人相鶴經

山水圖

一望東南竟海涯仙人何處飯胡麻樹陰靄靄欲生雨
山色重重似削瓜玄圃紫苔封藥草白雲流水隔桃花
天台司馬君休閒絕勝終南處士家

感懷

風花片片減芳春轉首關河氣象新有志誰能回避老
無憂何必去除貧開樓且喜青山近釣水多從白鳥親
聞說長安金紫貴不奔風雨即紅塵

寄王秋泉

尺書不寄海天遙兩見春風換柳條臺閣競瞻官濟濟
山林誰問鬢蕭蕭月明故國人情別花落江城客思饒
記得舊時携手處酒酣曾過飲虹橋

欽定四庫全書

竹齋集
卷上

三五

題米元暉畫

我生正坐山水癖展卷見山如蜜甜古樹含烟黑箇箇
遠山落日見尖尖險絕豈惟遊子慮清幽足慰老夫潛
行路望雲情更切不因小米故多添

山水圖

我生愛看真山水眼底崎嶇每自諳絕壑卧雲留宿雨
高林浮翠出晴嵐青山近屋多於簇白石攢沙小似蚶
展卷令人倍惆悵杏花春雨隔江南

過揚州

東南重鎮是揚州分野星辰近斗牛人物漸分南北異
江淮不改古今流瑤花香委神仙佩楊柳風閒帝子舟
十里朱簾晴不下銀鬕翠管滿紅樓

送薛府判之廣東

醜酒臨江亦壯哉別離無奈故徘徊喜聆烏府文章盛
又見堯天日月開萬里郵傳清譽遠百蠻歌動好官來
吟邊休說梅花老不是山中宰相才

欽定四庫全書

竹齋集
卷上

三十七

悼王濟川處士

上卿方駕紫雲車便寄江南處士詩白髮忽辭明鏡去
青山相對好樓居床頭筇竹生鱗甲牕下殘篇撲蠹魚
莫向九原嗟寂寞諸郎才俊馬相如

秋夜燕山旅舍偶成寄林致和

花漏無聲海月陰小窓燈火夜沈沈出師表動英雄志
征伐書移慷慨心邊塞雪深迷小草關河秋老見喬林
不須更論江南事擊劍長歌且漫斟

寄友

牕外疎篁脫故枝屋頭松樹已添圍水流荒澗花無影
雲落空山雨似飛別去幾時多有夢歸來一笑竟忘機
懷君欲寄江南信沙漠風高雁影移

偶成

桑田滄海事沈沈慨慷誰能論古今別足卞和因獻玉
然齊董卓豈無金雖求知己終難合差立功名錯用心
老子胸中頗明白只憐華髮不勝簪

欽定四庫全書

竹齋集
卷上

三

己丑二月三日大風雨雪

狂風推雲若山倒積雪滿路行人稀大家得意頻喚酒
老子畏寒愁解衣梅花出竹似索笑沙鷗見我能忘機
却思前載燕山北騎馬踏冰看打圍

今年二月氣候別十日大雪寒於冬民人正坐凍餒苦
燕雀如何意味濃風俗可知南北異山河空鎖百千重
草堂欲作梅花夢忽憶南陽有卧龍

三月二十九日夜歐陽省郎遞至佳章觀之技

癢燈下即和但無童子急走送耳

今時自與古時別酒興何如詩興賒風引白雲歸坐榻
雨蒸花氣入牕紗漫言海上神仙宅不抵江南處士家
有客相過勿多論老夫迂濶是生涯

四月十二日書懷

去年直北走風沙今日江南事事訛轉首不知春已去
閉門只覺樹陰多青天有月徒惆悵空谷無人絕笑歌
極目中原天萬里野煙荒草幾銅駝

欽定四庫全書

竹齋集
卷上

三九

春日即事

二月三日雨不歇桃花杏花吹作泥積壘可憐飛燕苦
傷春無奈杜鵑啼關河氣轉風雲合邊塞烽多草樹迷
老我疎狂思舞劍興來不待五更雞

別友

吳松江上聽春雨共說鄉關動寂寥滿地落花增感慨
故家喬木已蕭條十年舊事渾疑夢一別離情轉覺饒
後夜錢塘望明月鬢華無奈雪飄飄

感懷

客邸可言行路難故園無便寄平安夢回孤館燈火寂
吟到五更風雨寒南國山川頻入夢中原戎馬獨憑闌
田文一去豪華盡長缺歸來何所彈

招隱卷

寄爾太冲招隱篇歸來不用買山錢青雲遶屋樹如蓋
紅霧隔堤花滿川既有向時潛子興不妨今日米家船
老夫湖海亦覺倦也欲枕書林下眠

欽定四庫全書

竹齋集
卷上

四

寄李子粲

白頭自笑潛夫拙却憶風流李謫仙對客每言齊物論
移家只有廣文氈赤雞白狗看兒戲綠水青山作畫傳
慷慨不愁春色老笑看花雨落平田

有題

細草流光錦綉衢龍旗千乘擁金輿指揮漫說丁都護
獻賦可憐揚大夫花壓翠樓秋雨重雪圍氈屋夜燈孤
行人只說山川好不信沙塵上髻鬚

送圭玉岡

一真四法全吾道
教主雲間喜作家
白氣擁林龍繞樹
紫霞紛日鳳銜花
笑談不釋鐵如意
斬斫豈由金莫耶
可是阿師門戶別
相逢不喫趙州茶

送揚義甫訪雲林子

公子翩翩孰與儔
雲林清氣逼高秋
牙籤耀日書充屋
彩筆凌烟畫滿樓
既是有樽開北海
豈云無榻下南州
相逢一笑如知己
不必人間萬戶侯

欽定四庫全書

竹齋集
卷上

甲

醉賢圖

浩飲浪吟何慷慨
衣冠尚在晉風流
七賢林下固不異
六逸溪頭良可謀
既是甘為避世士
不妨且作醉鄉侯
幕天席地無留滯
笑殺三閭空白頭

送僧歸錢塘

故國荒涼草樹迷
春風猶記舊沙堤
山連天目孤雲下
潮上江頭海日低
送客過溪驚虎嘯
驅龍出洞聽猿啼
何時與我同清賞
淨取山泉煮木雞

梅竹軒為楊君道賦

湖上軒牕面面幽山居正是御書樓一枝晴雪連雲白
三徑清風似水流且喜往來無俗客只茲瀟洒勝封侯
題詩已有林和靖乘興豈無王子猷

舜江樓

舜江樓上一徘徊四面雲山錦障開於古豈徒賢二相
只今自可致三台月明鼓角空中起風靜波濤地底回
別駕清名動鄉國金鞍五馬望重來

欽定四庫全書

竹齋集

卷上

曲江春望圖

高堂忽見芙蓉苑恰似兩京全盛時翠幕高張公子燕
錦衣齊集內官儀樓臺影出青天近絃管聲回白日遲
花萼相輝銀榜麗水光山色綠差差

申屠子迪游蘭亭次韻答之

茂林脩竹蒼烟外斷碣荒亭古道傍俛仰乾坤慨今昔
笑談風月引壺觴幽蘭垂佩莖莖紫佳菊團金朵朵黃
誰信無錢陶處士脫巾瀟洒卧潯陽

送沙學正歸松江

范蠡岩前雲似錦
吳松江上水如天
送君去去青霄近
老我蕭蕭白髮懸
楊柳風清千里夢
梅花雪落五更船
對人休說儒官冷
聖主於今正待賢

偶書

聖主臨朝問好官
豈無公論在長安
野人不入麒麟畫
御史都簪獬豸冠
直北五更霜氣重
江南三月雨聲寒
繡衣驄馬金陵道
誰把梅花仔細看

欽定四庫全書

竹齋集
卷上

四十三

雜興

蕭蕭白髮滿烏巾
不會趨時任客嗔
種菜每令除宿草
煮茶常自拾枯薪
屋頭流水濺濺響
溪上閒花樹樹春
寄語儒林缺趙伯好
收風月作比鄰

送汪掾史

莫怪遲遲把酒盃
留君故爾強徘徊
市橋楊柳不堪折
江路梅花無數開
從此計程趨畫省
更期拾級上烏臺
底用懷思重回首
五雲多處是蓬萊

挽吳孟思號雲濤善書

雲濤處士老儒林書法精明古學深百粵三吳稱獨步
八分一字直千金桃花關外看紅雨楊柳堂前坐綠陰
今日窅然忘此景斷碑殘碣盡傷心

欽定四庫全書

竹齋集
卷上

四十四

竹齋集卷上

欽定四庫全書

竹齋集卷中

明 王冕 撰

五言律

次申屠子迪韻

荒城餘古堞登眺喜新晴日淡山容靜秋高海氣清孤
鷺隨鶴下飢兕近人行感物添惆悵誰能會此情

二

東南岩壑曾遊子欲何之野鳥驚飛疾溪船逆上遲放

欽定四庫全書

竹齋集
卷中

懷須醉酒對景漫題詩王謝經行處蕭條似舊時

三

海國秋風勁江城暮雨昏浮雲低月峽戍鼓殷雷門芳
草何年歇青山亘古存光陰如過客吾道底須論

答王聘君

門逕蕭條甚相知得往來人方戀升斗我獨撫尊壘故
國秋風慘荒城暮雨開閒中多樂意不在最深杯

二

平生無飲量難與醉鄉期老妻青雲志空聽白紵辭寒
煙昏塞口殘月淡娥眉此際天涯客淒涼祇自知

次韻荅樊山

余生百計拙世事復何言得句閒題石忘機或灌園每
憐魚涸轍多見鶴乘軒薄暮山風急秋聲處處繁

二

功名多跋涉貧賤得安閒坐石聽流水開樓見遠山報
衙蜂瀕洞悅景鳥綿蠻更愛斜陽外游雲作陣還

欽定四庫全書

竹齋集
卷中

三

山川今古在伯業已寥寥野霧迷花徑秋煙隔市橋溪
深新漲雨江濁暗生潮自喜茲行好翩翩遠市囂

四

市廛餘熱惱岩壑足清涼水靜魚兒樂風微桂子香異
邦人苦雨故國雁啼霜秋晚何多事吟詩送客忙

次韻荅王敬助

小隱水南村喧譁不到門無言及名利適意在田園春

雨桑麻長秋風果蔗繁生涯有如此何用覓桃源

二

西園餘薑蔗東臯足稻粱今年誠有望吾計未全荒倚
杖停吟久看雲引興長隣家新釀熟同醉菊花傍

三

慷慨登高罷風流入醉餘山田禾熟早海國鴈來初對
客無多論耽眠或廢書東南岩壑美時復命中車

四

欽定四庫全書

竹齋集
卷中

野雲依竹靜霜葉近牕明對此清幽景都忘喧雜聲看
書庸有感與世竟無情但願添松竹期君結隱盟

五

豐年真可樂那慮鬢邊霜新稻翻匙白香齏出甕黃相
逢宜脫畧不必論炎涼多少清游夢無能到帝鄉

六

鄉鄰同社酒亦足敘幽情著作輕莊子悲哀笑賈生荒
林孤鳥沒遠浦夕陽明休問東陵後栽瓜即邵平

憶王子正

雨重楊花落春深杜宇悲交情惟有我朋友更言誰雲
冷東山屐塵埋北海碑夜來茅屋下酸淚為君垂

有感

三春多是雨四月不聞雷盡道龍宮閔誰掀蟄戶開郊
原豐草木城郭滿蒿萊我老為時慮無言思欲哀

中秋次韻荅太虛

江湖漂泊久髮白不知年世遠人何在天空月自圓山

欽定四庫全書

竹齋集
卷中

河清有影草木淨無煙誰恤蒼生苦移憂到酒邊

九日有懷

拊髀憐佳節多年不在家有親垂白髮無意對黃華懷
古餘情曠登高望眼賒南山荒靄合日暮亂歸鴉

吉祥草

得名良不惡瀟灑在山房生意無休息存心固久長風
霜空自老蜂蝶為誰忙歲晚何人問山空暮雨荒

解悶四首

家園嗟寂寞客計轉踈迂事失非關酒身貧不為儒功名餘破楮風雨漫長途對景成何用高談却壯圖

二

荒城驚歲晚風雪奈何人野火殊無侶江梅自得春停杯吟思遠照鏡鬢華新底事堪愁絕悲茄撼塞塵

三

風雨交殘夜郊關雞亂鳴青山頻入夢白髮不禁情舞劍令人笑沽樽祇自傾忽思少年日騎馬漢江城

欽定四庫全書

竹齋集
卷中

五

四

寒氣薄衣絮斜風雪亂飄山林俄失色江海不行潮塞北羶車重江南甲騎驕草堂亦幽致冰凍滿詩瓢

歸來

歸來入境異故里是他鄉坐閱紅塵過愁多白髮長關山雲渺渺江漢水茫茫世事何多感憑高又夕陽

二

某水某丘在杖藜隨處行窮幽那適興豈是未忘情契

彼漁樵樂於吾勢利輕雲根老梅樹花發最分明

三

小齋塵不到寂寞野人家下榻來風韻看書度歲華已
忘巫峽月空惜武陵花欲問并州信故人天一涯

送雲屋僧

蘭若邊江次羈棲喜得鄰論交留客夜對酒燭花春風
雨相過近交情且是真無端話離別把酒忽傷神

村居四首

欽定四庫全書

竹齋集
卷中

六

辟世忘時勢茅廬傍小溪灌畦晴抱甕接樹濕封泥乳
鹿依花卧幽禽過竹啼新詩隨處得不用別求題

二

茅屋人看小我居殊覺寬雲開山滿座雨過草平闌古
意琴三疊清風竹萬竿養生無別具僻上破瓢尊

三

欲識吾居處屋前溪水流門交青薜荔籬蔓黑牽牛有
竹編書簡無花引釣舟生涯隨分已何用卜菟裘

四

英雄在何處氣槩屬山家
蟻布出入陣蜂排早晚衙
野花園部伍溪樹擁旗牙
抱膝長吟罷天邊日又斜

八盤嶺

路繞危垣上風高松檜鳴
花飛殊失意草長不知名
遊客咨遺俗居民指舊京
浮圖起天末瞻望忽傷情

村居

斷橋分野色曲徑入柴門
五柳低藏屋三家自作村人

欽定四庫全書

竹齋集
卷中

情同下里風俗異東屯我老無生計耕耘教子孫

二

綠槿作籬笆茅簷掛薜蘿
馬車渾不到樵牧自相過
卧看歸田錄行聽擊壤歌
優游只如此刀鋸奈吾何

三

人言村落僻我處頗清幽
竹色侵衣冷江聲繞屋流
歡呼同社酒出入趣魚舟
不用聞時事桑陰且飲牛

四

局厭塵中隱寬從野外居人情方密熟禮數覺生疎懸
榼空浮蟻陳編撲蠹魚客來縱談笑不必問吾廬

宋郊臺

蕩蕩南郊路金輿不復行古臺餘草色新樹自風聲寂
寞荒村景淒涼故國情遺民能道舊曾是御營兵

感慨

大道已淪謝世情那可論所經新傳舍多是故侯門路
險豺狼恣山空鳥雀喧餘生亦何幸注目合忘言

欽定四庫全書

竹齋集
卷中

二

東南多勝概古跡漸難尋諸老題詩處繁陰蔽石林雲
團溪雨重水落野塘深感慨添餘思孤猿入暮吟

三

故國江南郡繁華舊不同衣冠移習氣鼓角動悲風柳
倚湖光碧花連野色紅放懷沽一醉世事委狙翁

四

昨訪三生石今登二老亭癡煙含樹黑野草滿山青歸

鳥還知倦悲筋不忍聽又聞龍臆馬趨逐豹文甍

黃牛山

招提萬山底古屋蔽烟霞密竹先秋意長藤過夏花繁
陰沉雨脚清響激雲牙老衲眉如雪相逢話作家

福勝山房

不作殊方去每因茲地畱湖山全勝概松竹秘清幽下
榻同聽雨開尊為解愁得君多道義從此可無求

次古詩韻五首

欽定四庫全書

竹齋集
卷中

九

飛雲添遠思淫雨滯行期漸入老來景都非少壯時林
昏歸鳥疾溪急上船遲眼底元元弊何人念在茲

二

瀟灑衡茅下歲寒同此君幸遺山水窟得離虎狼羣有
酒懷元亮無才儼子雲寓形隨分已何用強求聞

三

湖映江城白山圍故國青感時花慘慘餘恨塔亭亭只
合從龐隱何須學楚醒歸來詩景勝蒼翠滿岩屏

四

蔽體可結葉充腸難飯沙風塵無日定朋友各天涯既
有杯中物那愁鬢上華古今歸一笑放曠是無家

五

屠沽慚壯士文繡貴山郎氣習蟲魚族風流雁鷺行從
時多俯仰弔古獨悲傷無奈連宵雨蝸牛上石牀

重過戴氏居

重過戴氏宅交游情味長乃翁敦德義諸子好文章濟

欽定四庫全書

竹齋集
卷中

濟衣冠偉班班事業張看他流俗下不肯論炎涼

二

矮籬編綠槿小徑入青桑屋遶河流潤門開竹色涼課
兒書滿架畱客酒盈觴西沼芙蓉美南薰穠稻香

三

琴書滿屋壁不下晉家聲湖海懷高義交遊閱古情宰
瓜緣暮景看竹喜新晴更約清高友山林結隱名

雨後

雨後千山淨炊煙處處新世情殊不足風俗豈能淳老
棘餘生意槁花空悟春相逢非古意在我着烏巾

槿花

不與百花期多從桂子時低昂如有序紅白自相宜農
為編籬識蜂因課蜜知想渠根本盛未畏雪霜欺

客邊

微雨久不歇浸成留客天銜盃聊復爾彈缺已蕭然落
葉饒秋恨鳴蛩減夜眠故園歸未得日日數行船

欽定四庫全書

竹齋集
卷中

二

澤國秋雲重淮山夜雨深感時多得句懷古獨沾襟照
鏡憐新髮持螯息壯心知音無處問冷落七絃琴

三

飄蕩將何倚淒涼不自禁江湖千里夢風雨五更心遊
子黃金印幽人綠綺琴渠方汨朝市吾合老山林

四

不學養生術且為歸隱謀青山猶昨日白髮不禁秋道

興須村釀忘機狎海鷗夜來何所事欲上仲宣樓

五

世事朝朝異炎涼處處同江山千古在風月幾時窮采
菊思陶令登樓憶庾公客情消不得又聽壯征鴻

次韻答中屠子迪府推

今日風光好梅花滿屋春年年長在客事事不如人道
路貂裘敝庭闈鶴髮新曉來看雨露小草亦精神

十二月三日對月

欽定四庫全書

竹齋集
卷中

十三

今夜初生月客中仍獨看遙憐吾老幼未解脫飢寒破
壁竄瓢壘踈梅霜雪團再思先子訓默默淚闌干

見雪

窮居忘節序見雪却憂寒漸漸山河失依依道路難故
人迷信息無客渡乾桑况爾西南地疲民夜不安

客况

為客少安睡終宵聽雨聲每因年歲晚不稱路途情貧
賤交遊少踈豪去就輕蕭蕭鬚髮改殊覺負平生

對酒

含笑看長劍開懷對酒樽
江風生席面山雨濕雲根
去國愁征戍豐年荷聖恩
莫辭情爛漫白首壯心存

送客

驪駒歌載道肯為薄書留
顧我衰遲質不禁離別愁
江花緣客興春水便歸舟
茲去青雲遠音書可寄不

寄友

寄語蓬萊客山寒松未花
祇因好春雨不得到君家
白

欽定四庫全書

竹齋集
卷中

十三

石通宵煮青萍忘歲華
近來聾兩耳那得聽胡笳

夜坐

夜深山館冷風雨滿江城
老客不成寐感懷無限情
蠻烟迷五嶺王氣屬三京
休問泥塗事荆榛處處生

會友

蠟屐衝寒雨柴門啓曉雲
相忘不問訊長久却論文
煮茗山泉活移花野色分
城中甚喧雜此地寂無聞

送大機上白雲

水月池頭屋曾同聽雨來故緣經歲別又過幾花開且
爾酌詩債深慚乏茗杯明朝出西郭離思不堪裁

二

東郡雨不歇西湖水亦高上人今日去行李不辭勞傳
法燈無盡懸崖屋更牢交情如問訊謂我只囂囂

掩關

竟日掩柴門脩然無俗塵幽花殊得意老樹不知春風
月臨清夜江湖憶故人西房老禪伯滿灑亦吾貧

欽定四庫全書

竹齋集
卷中

十四

寄存道崔隱君

有懷中默默舒嘯獨登樓月色不知夜江聲欲動秋寄
書空惹恨看劍若為羞何日乘清興山陰棹雪舟

旅次

露下竹風清孤樓恰二更天垂滄海極月轉大江橫道
味窮時熟詩情旅次生飄流何所擬秦華一毛輕

對景

景勝詩懷曠愁圍酒力降地雷晴破石山雨夜翻江夢

遠蓬萊館香餘薜荔牕諒無封建蹟白首困南邦

漫興

流沙連竺國大磧間和寧雲合陰山黑天垂瀚海青穹
廬駢駮裹葩葢建和鈴多少花門子相逢過北庭

二

屯聚皆羌屬蒼茫路轉西草深車跡淺霜重角聲低軍
馬行無數山林望欲迷老兵通漢語指點話征西

三

天時今亦異地醜古來非永夜惟消酒嚴寒未授衣一
時風色變萬里雪花飛小大持弓矢相呼出打圍

四

壯心殊未已望望盡黃沙韋帽籠鴉鶻囊載駱駝過
關南客少出塞北風多田牧俱荒廢空懷馬伏波

過水南

一到水南宅喧囂便不聞窻梅晴破雪庭樹暖凌雲閒
話經年別忘眠過夜分何時卜鄰住會老細論文

春晚客懷

春事已過半客懷何悵然
鳥啼雲外樹花落雨餘田
沽酒不成醉解衣徒自憐
五湖烟水遠未得問歸船

二

落落窮途客年年不在家
寄眠聽夜雨借景看春華
空著三山帽難防兩鬢華
清晨覽明鏡載笑復咨嗟

三

衣袖露兩肘難留使客棹
對山長發嘯得酒忽忘詩
樹

欽定四庫全書

竹齋集
卷中

七

濕吳雲重花殘越鳥悲
酸辛甘自受襤褸愧妻兒

四

花落春城暮登臨思倍清
買杯酬宿約聯句足餘情
三峽星河動九江風浪生
吾儕似無用思與白鷗盟

五

雨暴溪流急雲低樹勢平
山邊孤獨嘯林外鳥皆驚
小草添生意殘花減俗情
明朝整巾烏飽飯竹間行

六

詩酒從時適功名委壯圖好山隨處有間客近來無冠
蓋駢三輔烽塵暗四隅餘生營計拙且儻好樓居

七

賈誼治安策虛勞瀆聖明人民正凋瘵豺虎恣縱橫白
水沈南國青山沒上京吾儒無可奈老淚向天傾

世情

世情多曲折客况自堪憐聽雨愁如海懷人夜似年草
肥燕地馬花老蜀山鷓淡冷歸歎計蒼苔滿石田

欽定四庫全書

竹齋集
卷中

竹冠

竹冠橫五摺安用鐵絲梳班積湘江雨清銜嶰谷秋自
然堅節在難與俗情侔相見無疑怪先生不姓劉

客情

幾日不啓戶庭前青草多故緣詩思澁不奈客情何貧
賤家無定英雄劍懶磨江山千萬里回首一長歌

歸家

我母本強健今年說眼昏顧憐為客子尤喜讀書自孫事

業新燈火桑麻舊里村太平風俗美不用閉柴門

示師文

生涯猶未定歸去勿來遲故里雖云好吾家正及飢
敬尊須重禮對母說新詩梅竹平安否先書報我知

又

悵望倚門久月光清滿天念家情切切為客鬢娟娟
細草荒山徑遊雲過石田安能攜爾輩飽飯老林泉

執爨

欽定四庫全書

竹齋集
卷中

執爨那吾事非因媚竈來調和誠有道燔爨不遺材
對燎殊無愧不黔良可哀過從勿相笑破甑久塵埃

獨宿

獨宿輸吾慣石床苔蘚豐氣清神自固夢不與人同
燈焰懸空壁爐香裊細風如何紈綺輩服藥取奇功

種茄

種植便生地還宜去草萊所期羞膳具母吝日滋培
雨露恩時及風霜氣莫摧且令根本固看爾實恢恢

訪舊遊

今日放輕舟令人憶舊遊
看花穿水竹沽酒近江樓
故老論遺俗相知已白頭
晚來鄉思切孤雁楚天秋

偶書

浮雲生遠樹落日動江波
坐對青山好其如白髮何
寄詩憑問訊沽酒借顏酡
忽憶平時節吳淞聽棹歌

二

聞雞何用舞對酒且高歌
湖海情如故風霜老奈何
相

欽定四庫全書

竹齋集
卷中

十九

交知己少入夢好山多
玩世能成癖紛紛事已訛

獨坐

獨坐高樓暮淒涼何所聞
亂山流凍雨荒樹接孤雲
關陝鴉成陣幽并馬不羣
故人消息斷凋弊聞斯文

歸來

湖海飄零久歸來依舊貧
顧無青眼友喜有白頭親
籬菊留餘色庭梅奏早春
溪翁密相訪盃酒接殷勤

石湖寺

畧約江煙外招提水氣中故人於此隱幽致得時同釀
酒來彭澤栽蓮接遠公浮生底須論談笑且春風

二

相憶懸清夢相過笑白頭不因吾道重安得為茲留翠
竹邊江雨黃花小院秋明年春水足準擬泛扁舟

泊瓜洲

晚泊瓜洲渡秋風九月時野烟晴漠漠江樹綠離離客
思無人會鄉情有雁知斐才慚李杜對景亦題詩

欽定四庫全書

竹齋集
卷中

二

落日大江秋淒涼覺底愁逆潮攻敗壘荒樹入沙洲險
固空遺跡清年且壯遊不須腰十萬明日上揚州

泗上

弔古心何壯憑高氣更雄大風秋野濶明月故鄉同滿
灑繁霜鬢淒涼獨老翁夜深沽斗酒不異在新豐

沽亭道中

野亭依柳樹水路出桑林問俗誰能解懷思自不禁遠

山歸眼小孤雁入雲深可笑西京客持盃學楚吟

二

方離三柳樹又出下浩亭客路從茲去人情轉不寧關
河孤雁沒齊魯衆山青處處黃河道吾將補水經

南陽閘下

十月黃河道舟行濁水泥今晨見清淺不覺散淒迷雲
轉山腰斷天連野色低可知茅屋近忽聽一聲雞

師家莊瞻繹亭正對繹山魯地諸峯皆見閘水

欽定四庫全書

竹齋集
卷中

五

正合洙泗

綠水流洙泗青山出魯鄒憑高殊有興弔古不勝愁日
落江花重風生野樹秋掀髯一長笑不負壯年遊

閘上

舒嘯孤懷壯天風蕩杳冥草枯秦地白雲盡魯山青聞
道尊莊子沽孟候野亭平生辛苦事須信此行經

二

白霧都收盡青天無片雲候船車袞袞辭樹月紛紛紗

帽當壚婦兜鍪出塞軍不愁書寄少鴻雁動成羣

守閘

行船無十日守閘滯多時縱使心如鐵難忘鬢若絲野
亭花淡淡沙岸草離離日暮聞征雁令人有所思

汶上舟行

賢聖久不作我行真可憐望歸黃柳外坐到碧山前老
馬知官道飢鷹集野田晚風吹急雪回首一茫然

新店道上

欽定四庫全書

竹齋集
卷中

三

野水滔天去陰雲着地生活來新店酒不洗異鄉情白
髮蕭蕭謝黃花粲粲明山川雖跋涉道路却昇平

不飲

不飲非無量忘眠豈有謀赤心思報國白首願封侯界
紙題封事挑燈看蒯緱何時勲業就蕭散五湖遊

船上

迢遞三河路淒涼九月天遠山迷草木平野少人烟對
景情如醉浮居日似年壯懷消不得沽酒且陶然

汶上

汶水連洙泗源源有所歸聖賢誠可仰風俗自相違落
葉隨風舞孤鴻破雪飛紛紛名利客到此肯忘機

二

破夢聞金鼓關心望玉繩只知時候別不覺夜寒增凍
雨成飛雪長河走大陵客情無可奈却借驛樓登

暝色

暝色沉孤嶼秋聲入遠林飛鴻頻顧影獨客易傷心相

欽定四庫全書

竹齋集
卷中

識無知己交遊少信音未能酬壯志沽酒且長吟

客思

破衣懸軟毳短髮被秋風汶水長魚白滕州小米紅人
情今日異客路去年同萬里關山外孤鴻縹緲中

齷齪

齷齪寧堪處卑汗奈此逢看人騎白馬喚狗作烏龍濯
濯河邊柳青青澗底松待看天氣好應得露華濃

瀟灑

漸覺離鄉遠寧知出處迂風流看隊馬瀟灑入雙魚誰
解辭千乘無人說二疏老吾情不怯漫讀古人書

次致和韻

方見雲山出忽然風雨來暴生三尺水推去一階苔古
意何能解新詩止自裁天時與人事歷歷不須猜

日晚

日晚風雲起城空草木悲蛟龍能自聖騏驎不容遲漢
婦通番語羌兒厭杜詩老夫瀟灑處定是少人知

欽定四庫全書

竹齋集
卷中

慶壽寺

金時在城北野中今在城內
劉太保為僧於此墳在盧溝

寶剎都城內今朝曠野中浮圖瞻寶誌書記憶劉聰畫
屋烟花繞青松雨露濃徘徊增感慨歷落問英雄

二

書記去已久令人動慨慷但能成事業不解制綱常花
落重城晚雲沉大野荒盧溝三尺土春雨樹蒼蒼

渭河道中四首

平地連滄海孤城帶渭河行人俱漢語舟子半吳歌野

草鷺秋短魴魚出水多只憐鄉國遠處處有胡笳

二

披霧青天近梳頭白髮明山河千古恨風雨五更情塞
北浮雲慘關中王氣清草廬諸葛在未得話平生

三

月出東溟白天垂北斗低礪兵思秣馬舞劍忽聞雞諸
葛猶存漢田橫不辱齊英雄如有見瑣屑豈能迷

四

欽定四庫全書

竹齋集
卷中

三五

海氣團雲白江風吹浪寒飛鴻離塞遠獨鶴唳更闌慷
慨論時事羈栖笑楚冠蕭蕭黃葉下回首望長安

泊聊城

水宿聊城外忘眠聽漏聲浮烟連野白孤月近船明世
變山河在時移草木驚絕憐知己少感慨獨傷情

南歸

去歲離南去今年自北歸過淮渾酒賤出水白魚肥落
拓同誰語孤高與世違最憐譙國子潦倒說兵機

庚寅春二月三日甲子大雨雪

二月甲子雪霏花冷作圍乾坤移氣象草木轉光輝野
鳥渾無語邊塵濕不飛長安未歸客應是動心機

有感二首

絕國春風少荒村夜雨多可憐新草木不識舊山河世
事紛紛異人情轉轉訛老懷禁不得悵望一長歌

二

對鏡添惆悵憑誰論古今山河頻入夢風雨獨關心每

欽定四庫全書

竹齋集
卷中

十六

念蒼生苦能憐蕩子吟晚來愁更切青草落花深

雨過

雨過山光潤煙浮野色昏清泉流近砌黃葉擁衡門世
事憑誰論高情祇自存忽思浣花老又欲向東屯

二

歸來訪田里轉首憶關河黃葉階前滿白雲山上多人
情空爛漫世事儘差謊親愛子孫輩愁予兩鬢皤

閏七月二十三夜記夢詩

歷歷青山出翩翩白雁來感時徒憤鬱弔古獨悲哀夜
雨淒庭草秋花老石苔客懷消不得悵望一徘徊

二

對鏡多新白懷人入遠思山河猶漢魏風俗想軒羲小
草銅駝恨荒陵玉雁悲平生伊呂志耕釣豈無為

舟中雜紀

水竹連平野人家帶夕陽道途忘險阻風景異尋常借
艇移行李持杯看步光英雄無所似堪笑老夫狂

欽定四庫全書

竹齋集
卷中

三

二

舟行知牽穩恰得打頭風更喜青山出寧辭白髮窮江
楓緣岸赤河蓼雜煙紅回首東南景樓臺杳靄中

三

楊柳青雲合芙蓉錦幃開船從湖上過人在畫中來莫
問桓伊笛且傳袁紹杯明朝歸醉李舒嘯漫徘徊

四

泊舟枯柳下狹港喜無風水氛團煙暝嵐光帶雨濃竹

陰秋轉冷漁火夜深紅憶在山陽縣吟情與此同

五

蘆花歲別浦柳樹隔柴扉野鳥行行下漁舟兩兩歸只
愁風俗變不慮世情違舊日經行處於今轉覺非

六

秋茂喜禾壯官河帶野橋水光欺日白寒氣得風饒覓
火鄰船並沽醪市店遙傳聞征稅急不忍見漁樵

七

欽定四庫全書

竹齋集
卷中

九日今朝是淒淒多朔風黃葉渾未落烏柏最先紅對
景情何已懷人夢不通稻梁今歲薄無奈北征鴻

八

落日照船窗殘霞映碧江樹低蒼翠濕人雜語言唯貴
酒青衣獨歸山白鳥雙驅馳吾未已慚愧鹿門龐

九

野水連天碧秋花夾路黃順風船過疾落日鳥飛忙感
物徒惆悵逢時喜老蒼文章隨氣運不必論班揚

十

老樹轉斜暉人家水竹圍
露深花氣冷霜降蟹膏肥
沽酒心何壯看山思欲飛
操舟有吳女雙槳唱歌歸

元日示師文

骨格今年異衣裳舊日殊
讀書當努力寫字莫糊塗
百水翻三峽青山出兩都
老吾何所以賴爾得相須

遣興

破屋懸寒雨空窗度曉雲
家貧無外慮身老厭多聞
草

欽定四庫全書

竹齋集
卷中

五

木隨時長蟲魚自作羣
行吟聊遣興不必論功勳

二

直北黃河走江南白浪浮
人民正飢渴官府急誅求
處處催兵器城城建火樓
老吾頭已白忍死為君憂

三

老來百病出坐卧不能安
稍得春風暖尋憂夜雨寒
中原人倥傯南國步艱難
薇省分權重匡時自選官

四

旌旗明紫塞雲霧暗潼關盡說王師盛應知伯道艱東
風吹白草落日動青山羽檄飛邊報將軍信雅閒

水竹

水竹能瀟灑天然二尺強低枝均雨露直節慣風霜不
擬編書簡何時宿鳳凰幽人頗相得拂拭近茅堂

屋隅櫻桃伐去老幹而生新枝能實可愛

櫻桃元舊本根柢近西籬只為除枯幹翻令長嫩枝紅
嬌殊鶴頂甘美過蜂脾羞薦歸宗廟於今正及時

欽定四庫全書

竹齋集
卷中

山藥

山藥依闌出分披受夏涼葉連黃獨瘦蔓引綠蘿長結
實終堪食開花近得香烹魚入盤饌不餽大官羊

漫興

詔布河流復其功說賈生豈因疏鑿費恰重戰爭名軍
士雖然散農人尚未耕九州多禹跡何日與君評

二

燕趙官輸急江淮羽檄忙山崩雲慘慘河決水茫茫野

客愁無奈山翁老更狂塗傳軍士感即日下襄陽

三

草木何搖撼工商已破家饒州沉白器勾漏伏丹砂吳
下難移粟江南不運茶朝廷政寬大應笑井中蛙

四

四川聽雨化三輔受風清但得公行道何勞苦用兵關
山無阻礙淮甸漸清平聞說招民義銜哀事遠征

五

欽定四庫全書

竹齋集
卷中

五

一說妖氛起生民欲斷魂村墟空僻落市井變營屯盡
道無生計誰為奉至尊吾居更蕭索事業不須論

六

壬辰天意別春夏雨冥冥雲氣何時斂江聲未得停書
生憐白髮壯士喜青萍昨夜登西閣悲茹不忍聽

七

處處言離亂紛紛覓隱居山林增氣象城郭轉空虛俠
客思騎虎溪翁只釣魚諸生已星散那得論詩書

八

辟難人爭出居家我獨癡
况無親已老無奈病相欺
湖海迷舟楫關山振鼓鞞
忘機閒看竹得興漫題詩

九

密樹連雲濕荒村入逕斜
山童分紫筍野老賣黃瓜
忽要千鈞弩尋求百姓家
予生為計拙見景重咨嗟

十

撤幕愁歸燕顏垣警睡危
雨聲飛玉署花夢破琉璃
紫

欽定四庫全書

竹齋集
卷中

三三

詔傳三省黃巾出兩江
何時舞干羽盡使有苗降

十一

登高聊縱目懷古忽傷心
北極星辰遠中原草木深
天寒羣雁叫夜靜獨猿吟
處處知音少塵埃綵綺琴

十二

干戈猶未定鼙鼓豈堪聞
憂國心如醉還家夢似雲
關山千里遠吳楚一江分
朋舊俱零落空嗟白鳥羣

十三

濕雲垂地重孤雁入天鳴到處干戈近何時海岱清孤
燈懸古壁寒漏落空城可羨商山老優游待太平

十四

深秋天氣好且喜病魔消對客論三史令人愧六朝山
河空板蕩民物競蕭條白首思無策甘心學野樵

十五

秋風清瘴癘明月照山河絕國干戈少空城鼓角多脫
巾憐短髮醉酒覺身和漫對黃花坐無勞白苧歌

欽定四庫全書

竹齋集
卷中

十六

自笑青雲遠誰憐白髮孤艱難知道路瀟灑問江湖事
業留詩卷田園入畫圖清高過老杜囊底一錢無

十七

重陽今日是風雨滿空城白髮殊無賴黃花似有情山
寒孤樹老江淨衆鷗明且願烽塵息謳歌樂太平

十八

雨阻龍山會雲荒戲馬臺且看黃菊放休待白衣來事

業書千卷功名水一杯登臨聊復爾吟嘯漫徘徊

十九

吟詩懷杜甫持酒看吳鉤落葉千林曉飛鴻萬里秋只
嫌風俗變不為別離愁向晚聞征鼓徘徊倚小樓

懷鄉

關西吾故里八代不能歸墳墓今何在門閭故已非清
秋愁燕去殘日望雲飛豈是桃源客虛無與世違

即事

欽定四庫全書

竹齋集
卷中

雲黯山如醉風來樹若顛懷人多有夢憂國少安眠江
海浮鷗鳥山林叫杜鵑老生頭已白見景忽淒然

二

草徑無人到柴門盡日關脫巾垂白髮把酒對青山世
薄驚時異身貧得夢閒夜深明月下吟待鶴飛還

晚眺

密樹連江暗殘陽隔浦明不知秦塞遠殊覺楚天平故
國人何在荒城鳥亂鳴徘徊吟未已搔首忽傷神

二

雲騰山欲重雨過樹如新細路多行虎荒村不見人游
綠懸落日小草亂青春何處論知己過從白鳥親

秋吟

夜雨滋蔬圃秋風過草堂長歌追李杜高論入羲皇戲
水知魚樂尋羶看蟻忙兒童建勲業燈火得新涼

二

菜葉綠滿地菊枝青過闌有為遵古道無論及時官樹

欽定四庫全書

竹齋集
卷中

五

影經秋減湖光入座寬門前舊磯石閒却釣魚竿

幽居次韻

城市居何僻山林境頗同竹窗風細細花樹日融融
石留雲卧開渠許溜通兒童雖解事不識五花驄

甲午年正月初四日得春

昨宵嫌凍雨今日喜春風野草浮新綠園花結小紅漸
將農事動無奈病魔攻向晚登高望江山杳靄中

春寒

春寒多雨水地僻少輪蹄濕氣連山暗孤梅近竹低林
空飢鳥集城冷野狐啼回首關河道風塵道路迷

山陰水村

有水無行路人家箇箇幽青山開障遠碧樹入村稠縱
是比隣屋相過亦用舟我來瀟灑甚處處見沙鷗

二

草閣憑江置江深入夏寒看山詩思遠對客酒杯寬風
景雖然別行藏儘自安浮萍軒子好來往任繫桓

欽定四庫全書

竹齋集
卷中

三六

雪晴

起來敲石火正是雪晴時竹葉冰垂地梅花玉滿枝風
雲隨變滅山水轉清奇悵望長安道令人有所思

紙衾

楮衾能潔白孤卧得平安作客心如冰纏身雪作團吳
綾爛花草蜀錦動螭鸞未必清如此那堪慰考槃

丙申元旦守母制因感而作

今日椒花頌無能獻老親自憐垂白髮不敢着烏巾

落田園興微茫海國春話言兒女輩清苦莫辭貧

寄申屠僉事 時避寇來越

瀟灑樊山老年來亦可憐墨莊沉冠壘琴屋燼烽烟詩
好人能誦官清子得傳閒身隨所寓不必問歸田

山中雜興

去城懸九里夾地出雙溪傍水編茅屋移花近藥畦長
年無客到終日有猿啼利路何須問閒身儘可栖

二

欽定四庫全書

竹齋集
卷中

因拜山農號生涯日日新帶泥移瘦竹和蘚擇枯薪時
酌山泉賞都無世俗塵烏鳶雖見忌麋鹿自相親

三

居山還有趣劬地本無謀相顧誰青眼同盟盡白頭豺
狼迷道路猿鳥傍林丘休閒巢由樂吾心自可求

四

拄杖聽鳴鳩青山樹色稠雨寒雲不起沙亂水交流對
景堪垂涕無為亦動愁疲民正無奈誰解為君籌

五

散處身如寄幽棲屋似船江鳴風落雨山暗樹生煙架
有催詩簡囊無貫酒錢東鄰吳季子瀟灑亦堪憐

六

漂泊殊無定歸來得暫安不嫌知己少似覺傍人難梅
屋春風細松牕夜月寒交遊成契濶重檢舊書看

七

短策閒尋句長歌獨倚樓野雲迷客思花雨亂春愁論

欽定四庫全書

竹齋集
卷中

三六

事思王猛看書憶馬周老吾吾道在一一付滄洲

八

信是山中好春來物物豐石蠶生斷砌玉蕈出枯桐暝
雨蒸花氣晴煙颺柳風眼前無限景詩句可能窮

九

趣曠行山逕尋幽過野亭雨開雲氣白風動燒痕青桃
樹新生藥梅心小結形倚闌閒縱目物物得娉婷

十

小艇橫河過殘陽隔岸春水聲清繞屋山氣冷侵窓却
屐行花逕攜書坐石砭可知耕種好只擬鹿門龐

十一

細註歸田錄重脩種樹書自知身是客不嘆食無魚石
屋春雲重柴床夜月虛蕭條空四壁誰問馬相如

十二

眺望春光遠登臨夕照微野雲平細壘山鳥怪儒衣觸
處無高下何勞論是非寄言彭澤宰出仕不如歸

欽定四庫全書

竹齋集
卷中

三九

十三

山園無定式力作是生涯近水多栽竹依巖半種茶春
風低小草夜雨出新沙不必聞時事城中減大家

十四

溝塍通謝墅禹穴近龍宮兩水沿平地諸山在下風煙
霞時出沒日月互西東閒看桃源記吾將此意同

十五

石樓含曉色茅屋靜春暉野水中間落雲山四面圍長

歌樵擔起短笛釣船歸景物隨時至詩成思欲飛

十六

貧居得幽僻世事不相關詩思多因雨閒情獨愛山落花隨水去孤鶴望人還最喜神清健年來酒量慳

十七

家貧便食淡年老覺身癯細字憑兒看清樽待客沽惜春嫌謝豹顧兔憶韓盧悵望青山曲點頭愧野夫

十八

欽定四庫全書

竹齋集
卷中

早

卜宅近山阿柴門障薜蘿風清聞鶴唳日暝聽樵歌密樹懸青島平田浸白波村船乘暮景來往急如梭

十九

草徑如蛇縮茅廬比斗寬溪聲歸夜響山氣入春寒且自師伊尹毋勞說謝安有時間縱步長嘯白雲端

二十

寒雪滿空山出門行路難家人愁累重客子怯衣單寇盜因時起乾坤尚未安吾農清苦甚今日淨朝餐

玉筍山南入深塢人跡罕至真隱地也作詩紀之

幽宵無人跡虛空見遠天雪深山氣伏崖斷樹根懸烏鳥翻身入狐狸放膽眠老夫多脚力更欲上層巔

玉筍山麓有土阜高丈餘登眺可盡湖山之勝友人好事許作亭於上余意其有成先闢址以俟作詩紀之

基址經年定新亭幾日成望開吳地盡坐按楚天平野

欽定四庫全書

竹齋集
卷中

三

色重重見山光面面迎可宜方處士千古紀清名

示師丈

爾父既清苦爾身何可言且宜修道德不必問田園花落江城晚烟橫野樹昏此時光景異只合住山村

寫懷

去載情無賴今年興頗幽自居茅草屋不想木蘭舟膏土栽黃獨開渠引碧流溪翁來往熟相帥看沙鷗

安分

小徑入柴扉
茆廬隱翠微
土硯黃獨瘦
溪暝白魚肥
夜照明膏竹
朝餐淨露薇
人生安分已
何必論雄飛

題青田山房

青田劉處士
瀟灑好山房
夜月移花磴
春雲動石床
書聲通遠谷
琴響應清商
我欲相依住
臨流築草堂

丁酉歲元日九里山中

投時無歷日
獻歲喜天晴
道路何艱阻
山林似太平
梅香清海國
柳色上江城
且喜蘭臺近
疲民稍慰情

欽定四庫全書

竹齋集
卷中

三

立春八日

春雨洗殘雪
春風輕布衣
綠敷湖外草
青動石根薇
淮海烽煙盛
關山雁鷺飛
山居頗瀟灑
梅樹玉成圍

自詠

清苦誰能共
孤高祇自憐
為因知定分
不解問歸田
對酒傷春思
看書減夜眠
信無朝賀表
留病過新年

丁酉歲九月九日在慈溪是日小雨杜堯臣知
事攜酒過寓所

重陽今日是客邸忽悽愴樹葉驚風墮
絺衣襲雨涼黃
花銜古色丹桂發天香珍重東屯社
攜尊過草堂

有感

江湖成獨客風雨過重陽白髮懸明鏡
青山隔草堂野
花留別恨籬菊靜年芳聞說陶元亮
淒涼五柳堂

二

黃花渾未放白雁最先來好景無人識
新詩只自裁烽
塵迷玉壘烟草沒雲臺今古英雄事
何如水一杯

欽定四庫全書

竹齋集
卷中

四十三

三

慷慨看雙劍淒涼獨老翁不嫌天地窄
殊覺路途窮茅
屋荒山雨麻衣曠野風人情只如此
何必問英雄

四

依違思故里吟嘯倚闌干野水隨潮漲
山雲帶雨寒歸
鴻悲別渚羈客困長安何日干戈息
山林樂考槃

憶張彥威御史

挺挺張公子桓桓道氣充辭章驚世俗
膂力攝英雄且

爾交遊好能堪仕官窮如何風雨際埋沒亂離中

送太人之四明

勝地稱三佛佳山指四明雁飛江雨歇龍蟄海潮平見
客無多論看雲或動情有人問梅叟為說似浮萍

對雨

憂國頻看劍懷人獨凭闌野雲秋共黑江雨晚生寒盜
賊紛然起軍民未得安相逢誰慷慨隨處說艱難

二

欽定四庫全書

竹齋集
卷中

四

風雨秋冬接乾坤晝夜同正愁未黍黑況奈羽旄紅吳
越民難處江淮路不通交遊無定在空想北歸鴻

三

百草雨中死羣鳥天際飛風塵時變滅世事日乖違弘
景掛冠去少陵徒步歸丁寧劍歌更得酒且忘機

四

知少慮亦少閒多病轉多干戈愁正切風雨恨如何華
屋迷青草玄門暗綠蘿淒涼無可奈感慨動悲歌

五

三秋多濕雨十月見黃花對景無情思令人起歎嗟聰
嫌床下蟻病感酒中蛇又聽諸年少懷才擬賦瓜

竹圖

楚地秋風勁湘江夜雨深不看雙鳳舞恰聽老龍吟正
直崇高節歲寒同我心悠悠向京國轉轉憶山陰

懷人

懷人多有夢憂國竟忘眠野草皆成藥江雲半是烟悲

欽定四庫全書

竹齋集
卷中

四十五

鴻聯陣下老鶴唳孤鶩孰信殘陽外疲民間井田

愁重

慷慨添餘思交遊憶可人時危還有慮愁重不知春海
國迷歸棹關山擁戰塵黃公何所見終不事嬴秦

有感

白髮干戈際青山黯靄中沙蟲聯五馬缺襲三公東

海波濤黑中原草樹紅蕭條岩谷底誰信有春風

五言古體

感懷

松栢引藤蘿反被藤蘿繞剗草養禾苗禾苗不如草物
情有更變世事何足道君子小人交豈能長永好雲遊
本無定潦水空浩渺消涸固有時疇能見機早春風泛
紅綠造化太奇巧昨朝楊柳花今日浮萍草學佛不成
佛求仙豈能仙人因有貪所以不自然秦皇既已矣
梁武亦可憐何如飯牛翁萬事付無言

四月廿五日堂前萱花試開時老母康健因喜

欽定四庫全書

竹齋集
卷中

之

今朝風日好堂前萱草花持盃為母壽所喜無喧譁東
鄰已藤蔓西鄰但桑麻側聞義士招我輩鬢已華世事
既如此不樂將奈何

偶書

今晨好風雨濕雲四邊馳落花爛作土潦水積成池疲
民在塗炭朝暮苦啼飢况兼時氣乖好肉生瘡痍方憂
舊田穢無奈新城敬世情甚促迫天意將焉為我生合

忘言感慨徒傷悲

梅花易洞為胡伏臣賦

梅花擁林屋瀟灑極靜深清風散餘香皓月澄虛陰中
有學古人坐窺天地心神機一感動妙化不可尋持誠
問先民義皇有餘音

蠶作繭

老蠶欲作繭吐絲淨娟娟周密已變化去取隨人便有
為機中練有為琴上絃絃以和音律練以事寒暄其功
不為小其用豈為偏作詩寄蠶姑辛苦匪徒然

欽定四庫全書

竹齋集
卷中

四七

竹梅幽禽

梅花出修竹照影清溪深微風散寒香上有幽棲禽扁
舟載我來春色不用尋驅童貫村酒老瓦隨意斟興酣
岸烏巾大嘯喚老林明月在青天霜氣襲衣襟歸來草
堂靜獨坐彈鳴琴

留題悠然閣

高閣潭空影開牕徹虛明依依楊柳陰微涼入床清原

田遠風交平林素煙橫喜無車馬來而聽禽鳥聲境物
隨所適於心淡無營悠然會真趣得酒輒自傾客至竟
忘言坐對南山青

山中

雨過百溜鳴雲消衆山出鳥啼松逕深來往無車轍幽
居少人事足以養吾拙讀書故無用徒然較優劣辟世
豈云迂自與桃源別

南風熱

欽定四庫全書

竹齋集
卷中

四六

炎風來何狂似欲吹山倒狼藉樹底雲散漫屋上草赤
日熾大爐泥沙熱如炒東臯與西隴禾苗盡枯槁疲民
日苦飢性命未可保誰推至誠心懇致桑林禱願得甘
雨沛洗我煩熱惱

遣興

鑿井思所汲耕田期有秋人生豈無志每為飲食謀紛
紛路傍兒儻蕩思公侯風雲一轉折事業不可籌何如
澗底泉清清長自流

二

種禾莫存秀種樹莫引籬引籬苦其樹存秀傷其禾營
營百年內變滅成幾何結交苟不擇中道生怨窩可信
一寸水能起萬丈波

感懷十首

太極本一氣胡為兩儀分生生立名字萬景遂紜紜洪
荒不足徵至精亦已淪務猶茂佳景蔥蒨爭益益益益
漫渚澤蒙龍冒蘭蓀菲菲白日晚颯颯秋霜繁華滋竟

欽定四庫全書

竹齋集
卷中

四九

蕭條芳情欲何言

二

蒙莊曠達士魯連倜儻生不徼一時利乃有千載名睢
澤務詭譎儀秦尚縱橫反覆弄小技於道未為貞聖賢
久不作餘生復何營賴有白鷗鳥可與忘世情

三

寫字不通俗讀書難療飢蓬蓬塵網中遑遑欲何之仁
風霽原隰草樹發幽姿羣動正翕集遊雲未來歸懷哉

鶴上人徘徊感良時無以慰寒劣樽酒聊自怡

四

傍溪種篁竹十年望成林不圖列貨殖願布九夏陰變
化期未至枝葉漸蕭森忽值桑田移根苗竟沈沈爰筠
無事書斷節少賞音東里已寂寞空持歲寒心

五

榭衣山中人短髮披襟領寸心雄萬夫片語重九鼎不
作好顏色遂與世俗迴始旦旭日明默默有深省上愧

欽定四庫全書

竹齋集
卷中

五

飯牛戚下懷捫虱猛愾懷復愾懷照鏡可憐影

六

高樓古明月孤坐感涼夜云胡遠行客不悟歲年邁風
暝百草芳露冷衆木瘞天地豈無情物色有榮謝人生
匪金石焉得不朽壞寄語茹芝翁細故奚蒂芥

七

浮生失故業窮歲無寧居朝行汙隴間暮止滄海隅淒
其風雨交飢寒困泥塗寥寥太古懷目擊誰與俱齊君

不好瑟嬴氏不愛儒舉世媚同塵出類為疏迂何如歸
去來且作耕田夫

八

紫霞結重蓋五城十二樓中有青眉仙翠織鱗花表天
漿飯玉屑恣樂無停休自謂能長生可與造化遊悲風
一何來吹動人間秋瓊窗激寒響深閨起離愁欲飛肘
無羽延頸望玄洲玄洲不可到始悔違前修

九

志士惜白日愁多感夜長夜長固無奈况復重淒涼昔
我同心友漂流在他鄉他鄉各異俗所習諒非常道路
阻且遠無由吐中腸俯聞流水聲仰歎明月光振衣風
泠泠矯首天茫茫

十

芳草擁幽翠嘉樹鬱層陰山光到窗戶禽鳥和好音閑
茲清景逾古懷獨沈吟沈吟奚以為摠情委鳴琴

秋懷十二首

悲風度古木吹我屋上茅
茅去屋見底風聲尚蕭蕭
人心一何苦人情一何驕
却將眼下淚散作炎上膏

二

明月下西窗窺我席東枕
枕中夢忽破俄然轉淒涼
美人天一方相見猶拾潘
何時引金壘開懷笑歌飲

三

衆星晨離離孤月夜皓皓
白露成野霜凋我窗下草
人無千歲期焉得不速老
終當隨物化榮名亦何好

欽定四庫全書

竹齋集
卷中

五三

四

滾滾栢間露濕我征裳
衣裳衣濕何苦故人中
道違逝水東北流杳杳
無回期惟有天上月悠悠
照相思

五

淅淅涼風起唧唧寒蛩鳴
草木鬱氛祲兩曜銜暉明
河源失故道岱宗眇餘青
憑虛發浩嘆遊子萬里情

六

驅驅上南國依約金張里
舊日三重階風雨埋荆杞
青

山故無恙流水猶未已
幽幽樹底禽哀歌為誰起

七

朝行太行路夕渡巫峽水
所至或相觸舟車竟推毀
人生各異面方寸千萬里
片語苟不符其險過於此

八

野蔓網叢棘下有幽蘭花
緘春斂華滋古意良獨多
霜寒九十月蕭颯如枯莎
但使本根在菅茅將奈何

九

欽定四庫全書
竹齋集
卷中
五三
青松生崇岡土淺松低徊
顧茲歲寒質豈匪梁棟材
無奈牛羊牧鄙賤蒿與萊
惟有溪上風清聲寄餘哀

十

東籬有佳菊不比春蘭芳
繁霜毒萬枿敷榮自彌章
云胡靖節後古意俱茫茫
但見三徑草寂寞淒餘香

十一

庭前碧梧樹上有幽棲禽
養成五彩雛鳴動黃鍾音
儼之簫韶間叶彼聖賢心
夫何失其所委置荆杞林

十二

酌彼澗下水彈此石上琴希聲應絃起幽幽孤鳳吟曲
中萬里意三嘆無知音豈但無知音終恐無知心

寓意十首次敬助韻

元龍湖海豪忘懷但高眠淵明辟世士素琴不張絃古
意各有適薄俗空媼妍所以武陵翁種桃竟忘年

二

白露下亭臯綠葉颯已槁弱質不自貴却怨秋風早嗷

欽定四庫全書

竹齋集
卷中

五十四

嗷征雁鳴遊子在遠道如何鹿皮翁忘言對芳草

三

森森廊廟具蕭艾成長松蠢蠢川澤靈蛭蚓為游龍時
明在除被世混姑相容忠義在草莽讒諂分提封擾擾
路傍兒仰面慙征鴻

四

荆軻上秦殿酈生下齊城斯須屬鼎鋸何如衛叔卿脫
身傲萬乘秦華鴻毛輕所謂達道人貴在機決明

五

青松歲寒物詎比蒲柳才冰霜雖剝蝕踈花應時開良
工豈不偶中心類寒灰却憐蕨蕪草徧滿黃金臺

六

聖賢不浪出處士匪懷居孔明是何人高卧南陽廬躬
耕良自苦待時故躊躇所為梁父吟豈比封禪書

七

蠻觸雜奔競蠅蚋紛爭喧鸞鳳巢枳棘鴟鴞集琅玕風

欽定四庫全書

竹齋集
卷中

五五

雷久不作野露生微寒壯士萬里懷肯謝漂母餐古
來王佐才多在耕釣間

八

后地生虛雷天驚漏秋雨女媧死已久此罅誰為補紛
紛讀書兒碌碌無可數古人今人心今人不如古

九

飄飄青瑣郎翩翩袷綺衣媚媚紅樓春昏昏不知歸朝
覩綠髮潤暮驚白雪飛只有陶隱居頗能知此機

十

太行本無險黃河諒非深堂堂大丈夫恥為遊子吟俯
仰宇宙間寧無聖賢心何當五絃奏南風聽遺音

孤梅詠

孤梅在空谷瀟灑如幽人不同桃李花那知艷陽春冰
霜歲年晚苔蘚青滿身鼎鼎既不辱風味良自珍孰信
姚黃枝來作爨下薪

琴鶴二詩送賈治安同知

欽定四庫全書

竹齋集
卷中

五

猗猗綠綺琴中秘雲和音一彈動鳴玉再彈鏘南金翩
翩玄鶴舞幽幽孤鳳吟嗟哉塵俗耳折楊聽哇淫淳源
日凋謝誰識雅與南願更南風奏以慰斯民心

二

皎皎華表鶴古質清且閒曠哉萬里懷皓月同踰躔飢
啄芝田春渴飲瑤池泉一鳴九臯遠夢繞瓊華寒下視
寰中人誰識橫江仙豈無王子喬相期青雲端

初夏閒興

支頤坐鴻濛隱隱窺太古我生尚無懷於焉事巢許兩
曜如過客萬彙皆逆旅寒去暑復來誰賓復誰主齊物
不足論有酒且容與推窗看遊雲山花墮紅雨

墨萱圖

粲粲萱草花羅生北堂下南風吹其心搖搖為誰吐慈
母倚門情遊子行路苦甘旨日以踈音問日以阻舉頭
望雲林愧聽慧鳥語

二

欽定四庫全書

竹齋集
卷中

五

萱草生北堂顏色鮮且好對之有餘歡背之那可缺人
子孝順心豈在榮與槁昨宵天雨霜江空歲華老遊子
未能歸感慨心如搗

離別吟

寒風颯大野行子行河梁執手不忍棄遲遲復遑遑朋
友會面難慷慨熱中腸人生豈無家結交在路傍今晨
強綢繆明各天一方相見苦不早離別徒悲傷

讀五柳先生傳

淵明千載士志節尚苦清奈為五斗米受彼縣令名東
帶見督郵頗亦用下情當時豈無議以後何平評苟非
歸去來五柳傳不成

李侯事實諸儒先生序文詳矣然堯明之孝行
吾黨又可知者因作詩二章其一悼李侯之
未歸裁其二閔堯仁之行也

李侯世名仕譽重才德優清白樹嘉政藉藉載歌謳夫
何輓塵鞅幽幽滯南州游魂未能歸永懷故園丘孤雲

欽定四庫全書

竹齋集

卷中

落日淡驚濤大江秋匪以見者悲抑為聞者愁我亦陟
岵子忽覺涕淚流

二

李君瀟灑姿淪落在羈旅相見無長言潛然淚如雨一
身顧何為七喪未能舉江山隔中州遙遙望鄉土豈以
途路艱所值時節迂烏烏有私情而人復何處行行望
蒼天那知此情苦郭范久不作此義孰為補

鸚鵡謠

鸚鵡謠者蓋即事而立名也春秋書鸚鵡來巢紀其異耳浙間有妖術者余姓為全真居民多受惑而館穀之其用術時人家女子婦人俱與之通事暴受刑而去因作詩紀之以備觀民風者察焉

鸚鵡入樹腹睢鳩亂關關妖氛扇幽邃幻惑成至歡漫漫恣宵旰終永期無患淒雨苦何其餘花慘無顏風俗陡衰毀教化委荆管君子致遠慮隱憂增愴歎

欽定四庫全書

竹齋集
卷中

五九

江南人教獼猴舞郭郎街市小兒紛紛馳逐故

作詩戲之

獼猴本獸屬野性殊不常俄然脫穢垢冠蓋儒衣裳斂醜者面具向人舞郭郎跳踉媚小兒時得梨棗嘗假彼草木味換此蟣虱腸終然匪我類教養徒自傷不如奪衣巾棄置山野傍

傷亭戶

清晨渡東關薄暮曹娥宿草床未成眠忽起西鄰哭敲

門問野老謂是鹽亭族大兒去採薪投身歸虎腹小兒
出起土衝惡入鬼錄課額日以增官吏日以酷不為公
所幹惟務私所欲田園供給盡罄數屢不足前夜總催
罵昨日場胥辱今朝分運來鞭笞更殘毒竈下無尺草
甕中無粒粟旦夕不可度久世亦何福夜永聲語冷幽
咽向古木天明風啓門僵屍掛荒屋

有感

江南有古客布衣狂而愚區區許何為竊比莘野夫養

欽定四庫全書

竹齋集
卷中

卒

素體良貴順適無覲覲宵旰覲黎民戰戰愁金魚去古
歲已邁視今時已虛豈無聖賢心坐看爾輩痛方來上
下交一以利所趨開心論道義眾口尋胡盧斷斷君子
行蕩蕩成疏迂尚志何栖栖忍為塵土汙簞瓢陋巷中
其樂頗自如不慮貧賤苦且喜父母俱寒至十月交雨
雪已載塗念彼遠戍卒羨此山澤癯雖無五鼎味那有
三族誅吁嗟路旁人何如賦歸歟

懷友

登樓復登樓古月缺復滿美人天一方眷眷衣帶緩沉
吟向空窗個個席不煖跬步隔千里夜冷愁夢短卷紙
難與伸迴腸終欲斷何當御飈輪相從事蕭散

自感

父女生我時愛如掌上珠襁褓辟寒暑乳哺隨所須周
歲會言語大小相引呼搖頭却梨栗行行不須扶三年
離懷抱已知親與疎相揖識進退應對無囁嚅五六漸
精爽氣貌與衆殊怡怡浴仁化喜聽論之乎八齡入小

欽定四庫全書

竹齋集
卷中

至

學一一隨範模厭觀說謫行不讀非聖書宗族譏我異
父母憫我孤賓客皆回頭指為汗血駒長大懷剛腸明
學循良圖碩畫決自必不以迂腐拘願秉忠義心致君
尚唐虞欲使天下民還淳洗囂虛聲施勒金石以顯父
母譽此志竟蕭條衣冠混混塗蹭蹬三十秋靡靡如蠹
魚歸耕無寸田歸牧無尺芻羈逆泛萍梗望雲空歎吁
世俗鄙我微故舊嗤我愚賴有父母慈倚門復倚閭我
心苦淒戚我情痛鬱紆山林競蛇虺道路喧豺豕荒林

落日陰羞見反哺烏烏鳥有如此吾生當何如

送李德仁濟南鄉試

巖前有古桂鱗甲森蒼蒼吹涼洗綠煙永延清夜光
林既已榮燕山亦已芳於今贈君去願挹秋天香

二

江上有古柳搖颺絲依依容光照青眼薄妬紅樓眉
玩之益何喜攀之益何悲於今贈君去願染春風衣

畫貓圖

欽定四庫全書

竹齋集
卷中

六三

吾家老烏圓斑斑異今古抱負頗自竒不尚威與武坐
卧青氈傍優游度寒暑豈無尺寸功衛我書籍圃去年
我移家流離不寧處孤懷聚幽鬱覩爾心亦苦時序忽
代謝世事無足語花林蜂如臬禾田鼠如虎腥風正搖
撼利器安可舉形影自相弔卷舒忘爾汝尸素慎勿慙
策勲或逢怒

頽語次楊廉夫進士古聲韻

老頽冰滿頭不識宮妓口窮年豈無為棄置如敝帚玉

杯漸消磨含默甘老醜余生重其功悵然懷永久昔在三墳前勇銳破繩紐叔世去籀法十鼓迷八九玄風變復變歎識歸瓦缶春秋已獲麟大義孰為守紛紛雞雉翰崢嶸出其右班生狂不事張生顛欲走空餘五色夢幻入歌奴手世乏昌黎才誰能傳其後削纖管城封寂寞中山胄所以胥吏徒刻覈嘲腐朽

申屠子迪試吏為山南江北道憲司掌書巡按至夷陵缺文廟有曹操祠子迪毀之更立學

欽定四庫全書

竹齋集
卷中

六三

宮諸士夫作詩文頌美之僕居草澤中獲觀其卷因贊之

仁風藹區宇聖道日月明膏澤育萬彙衣冠樂昇平夷陵雖云僻豈無王化并奈何洙泗流不泮荆楚氓蠱惑祠奸操聲教若掩扃樊山老文學執法開杳冥蕩滌衆陋習魑魅不能撓巍巍魯靈光中天麗晶瑩一變風俗美再變禮樂興允矣千載下勲業昭汗青

鳳凰臺

生長當盛世無家足遨遊行登鳳凰臺縱目萬景收山
川尚形勝故迹殊可求環滁起西南三峯翠相繆落日
淡天闕紅塵障層樓盈盈佳麗地每每風雨愁我老無
所為懷古心悠悠俯仰四十帝盤礴三百秋於今竟何
如草樹迷荒丘惟有大江水不改今古流徘徊發長謠
感慨追前修謫仙既已矣少陵安可留粲粲石上詩凜
凜霜氣浮書生往來頻抵用多唱酬且沽數斗酒醉倒
歸來休

欽定四庫全書

竹齋集
卷中

十四

對菊

世路多詰屈吾行已悠悠陶公歸去來此志良可求開
懷對黃花萬事一笑休得酒漫斟酌更為斜陽留人生
適意耳何用從遠遊五湖有閒棹三峽無安流所以曠
達士不為貧賤憂紛紛刀錐革瑣屑非我儔

題凝雪水仙圖

出門大江橫銀濤數千頃仙子御輕颺環珮搖虛影中
宵月無光天地冰壺淨輕盈何所之飛夢西湖冷

雜吟

前日出東郭寒凍未解圍今朝開北牖青草已滿池飛
飛羣鳥歡老木長嫩枝馳書報幽人難得此良時休負
頭上中有酒且自持

二

出門好山色况值風日暄依依楊柳莊鬱鬱桑柘村行
遊蹊路曲如在故林園白烟橫遠嶼紅花粲晴原人生
豈無情欲語已忘言

欽定四庫全書

竹齋集
卷中

六十五

三

巢父誠辟世許由真隱淪勢利既已忘天子不得臣栖
身碧山中洗耳清澗濱悠悠太古懷坐着花鳥春所以
後來者可望不可親

心遠軒

淵明賦歸去寓意在田園結廬襟人境喜無車馬喧秋
風菊采采春風柳娟娟人跡日已踈世事日已遷高卧
北窗下夢寐羲皇前蕭散萬慮空豈但琴無絃上人絕

遐想所適乃自然端居中澹寂不在地靜偏緬懷千載
風所以名吾軒

畊讀軒

路逢誰家子背手牽黃犢犁鋤負在肩牛角書一束輒
耕且吟誦息陰坐喬木南山豈苗肥東臯雨新足涼氣
滿郊墟書聲出茅屋古來賢達人起身自耕牧買臣負
薪歌倪寬帶經讀寄語少年徒行當踵前躅

冀州道中

欽定四庫全書

竹齋集

卷中

我行冀州路默想古帝都水土或匪昔禹貢書亦殊城
郭類村塢雨雪苦載塗叢薄聚凍禽狐狸嘯枯株寒雲
着我巾寒風裂我襦盱衡一吐氣凍凌滿鬕鬣程程望
煙火道傍少人居小米無得買濁醪無得酤土房桑樹
根彷彿似酒壚徘徊問野老可否借我厨野老欣笑迎
近前挽我裾熱水温我手火坑暖我軀丁寧勿洗面洗
面破皮膚我知老意仁緩緩驅僕夫竊問老何族云是
奕世儒自從大朝來所習亮匪初民人籍征戍悉為弓

矢徒縱有好兒孫無異犬與豬至今成老翁不識一字
書典故無所考禮義何所拘論及祖父時痛入骨髓餘
我聞忽太息執手空躊躇向蒼天何時可能甦飲
泣不忍言拂袖西南隅

歷棗強縣

我生值數奇長年但奔走風霜苦侵凌焉得不白首前
日東阿城齷齪渾雞狗今朝棗強縣躑躅隨人後淒涼
有誰知辛苦祇自受解凍燎枯槁屏寒貫黃酒驅奴問

欽定四庫全書

竹齋集
卷中

六十七

程途炊糧借刀斗休言美其味且自餬其口臙垢不能
去面貌殊覺厚登頓過村落不復論妍醜或遇短髮嫗
或見長眉叟指點向人言此地荒涼久東住河西使西
居太原守高樓對甲第過眼成林藪更有好墳墓亦復
為田畝富貴生滅漚禍福翻覆手彼時與此時視吾何
所有我聽老叟言感慨欲吐嘔却羨陶淵明歸來種楊

柳

山中作寄城中諸友

山深無行踪，蹊路土華長。白雲忽飛來，令人起遐想。松
間微風奏石罅，幽泉響坐久。懷抱空悠然，會清賞在山。
雖無榮出山，有何好清流。混潢汙遠志，成小草松柏本。
貞固蒲柳易枯槁，擾擾路旁兒。知止不如鳥，白雲開林
巒。黑霧漫城郭，出門道路違。蠢蠢都不覺，游蟻上枯槎。
歸鳥隱叢薄，寄語遠行人。莫待風雨惡。

自崔鎮至濟州人情風俗可嘆三十韻 排律

天闕星河近，關山道路長。斷雲依野樹，歸鳥傍斜陽。弔

欽定四庫全書

竹齋集
卷中

六六

古添惆悵傷時重，慨慷艱難衣帶緩。辛苦鬢毛蒼，昨日
辭崔鎮。今晨過呂梁，躲船愁萃確。打牽畏汪洋，舟子招
呼急。商人問信忙，新州山頂上。沛縣水中央，古昔英雄
地。蕭條戰鬥場，歌風傳漢祖。決勝信張良，轉首風雲改。
重瞻日月光，喜看新社稷。不問舊封疆，魚鱉行官道。狐
狸上廟堂，淒淒黃葉浦。淋漉白蘋鄉，提挈何狼籍。奔趨
適詐狂人倫，俱喪失風俗。盡凋傷白紵，流吳曲紅花。爛
楚芳，禮儀從此廢。廉恥竟何將，戢戢哀流落。糾糾俱暴

強郎官思卓魯牧守想龔黃鷹隼鋒稜勁豺狼氣勢張
撫綏徒文飾漁獵盡逃亡東魯書聲寂西秦客夢揚可
憐吾老大那忍見淒涼飢望家家火愁懸處處腸競穿
泥窟穴爭覓草衣裳密雪團花大飛冰就木僵垂情徒
鬱鬱極目轉茫茫聖主春秋盛賢臣事業張願言宣德
化四海一陶唐

欽定四庫全書

竹齋集
卷中

九

竹齋集卷中

欽定四庫全書

竹齋集卷下

明 王冕 撰

七言古體

葛仙翁移家圖

青山無雲白日遲仙翁移家何所之或以丹砂到勾漏
或為家累遭驅馳烏捷背上妻與兒顧盼未解知其歸
仙翁讀書自怡怡坐穩不覺路險熾牛羊猫狗先後隨
老奴老婢俱忘機仙翁去就無不宜豈以偷生辛苦為
君不見風水洞前草離離淡烟寒雨愁淒迷又不見雲
門長松啼子規春風落花事已非神仙有無吾未知神
仙有無吾未知人生有酒且自持秦皇漢武徒爾為

孫元實春遊圖

先生讀書不閉戶坐閱鴻濛窺太古衣冠瀟洒武前修
禮樂從容出東魯文章光燄駕李杜李杜後來稱獨步
談辯風生四座春胸中別有天台賦相逢抵掌不露機
却說少年騎馬時春光澹沲隨所之好山好水多賦詩

轉首東風吹馬耳猶記松陰調綠綺杖藜不憚步行遲
孰謂畫圖無乃是我生山野無所謀白日灌園夜飯牛
安得先生與之游買酒共上黃鶴樓

四牧圖戴嵩畫

牧兒小職奚以為力耕得暇則放之浴流飡青隨所宜
豈同人牧潛危機重爵厚祿那自欺坐看敗肉加鞭笞
何如牧兒心坦夷出入自在無羈縻高林雨晴白日遲
平原春暖芳草肥牧兒樂事從可知釣魚吹笛怡怡而
欽定四庫全書

竹齋集
卷下

二

牛犢茁壯長厥肥老我亦有豐年期披圖載頌四牧詩
龔黃召杜今是誰

夏節士

夏石巖雲間人浪遊得教授北方在郊邸伯
太師在相位郊受戮夏先生知其無罪而死
屢上言宰相宰相奏請于上昭雪郊罪復其
舊有夏不受官郊子年賜米幣若干兼與扁
舟一葉放遊湖海間名飛雲軒世稱節士揭

曼石作傳名賢多為賦詩

夏侯先生天下士風流倜儻忠義俱平生勲業能自知
腹內更有非常書浪遊不廢燈火讀騎馬兒郎空碌碌
王門講道三十年坐使窮荒移國俗浮雲蔽日客夢單
勇銳欲食奸臣肝徑持白事上天子不顧宰相與何官
沈寃昭雪清四海舊時枝葉生光彩至今長安諸小兒
拍手為之歌慷慨歸來弗受大官名五湖一葉扁舟輕
丹青徒寫蕪子卿黃花自友陶淵明老我論交苦不早

欽定四庫全書

竹齋集
卷下

三

意氣相期且傾倒讀公佳傳誦公詩江南節士如公少

送沙德潤之鄆城

公昔新著進士衫道酣氣岸清且髯政事堂堂史冊載
威儀肅肅民具瞻光風回春靄芳草剝水殘山振枯槁
至今吾鄉諸父老去思劇口談公好當時進士幾百人
奔趨袞袞登要津時雍所溉聖澤厚仕宦未有如公貧
公之家世秉周禮伯叔兄弟官濟濟飲冰食蘘二十載
濁涇終不汙清渭而今四海樂太平太平天子堯聰明臺閣

諸老皆老成豈不與公書大名鄔城絃歌固非左達以
長官無不可故人天上待公來繡衣白簡青驄馬

曹雲西畫山水圖

前年常見雲西畫今年始識雲西翁文章驚世世所重
筆力到老老更工流水涓涓石鑿鑿一嘯長才風雨作
豈云筆底有江山自是胸中蘊丘壑昨日亭東白雲起
悵望吳松滿江水安得先生乘興來寫我江南雪千里

贈寫照陳肖堂

欽定四庫全書

竹齋集
卷下

君不見鑑貌但鑑影寫貌難寫心霍光鄧禹在臺閣嚴
陵魏野居山林功名道德照千古不特肖貌傳至今固
知寫貌易心難狀之妍醜筆可得至理不在顏色間陳
君筆力異衆史相貌既同心亦似昨日忘機入城市草
衣著我丹青裏氣爽神清誰比擬雪霽梅花映秋水黃
童白叟指點看此老不是儒生酸陳君陳君容我間莫
教添上貂蟬冠

水仙圖

寒風蕭蕭夜入戶渺渺雲飛水仙府仙人一去不知所
池館荒涼似無主江城歲晚路途阻邂逅相看顏色古
環佩無聲翠裳舞低徊欲語情悽楚十二樓前問鸚鵡
滄海桑田眯塵土王孫不歸望湘浦芳草連天愁夜雨

棠梨白練圖

芙蓉香冷簫聲杳月淡烟青楚宮曉仙禽不語雪衣輕
相逢却恨秋風早土花翠淺霜露濛山梨小結丹砂紅
主人醉倒不知春夢回故苑寒雲濃

欽定四庫全書

竹齋集
卷下

五

蘆花道人換被圖

高昌野人見幾早髮須不待秋風老脫身放浪烟水間
富貴功名盡除掃坐對漁翁交有道青綾何似蘆花好
從時拜賜蘆花人白云不讓今古貧高眠聽夢夢更真
白月滿船雲滿身起來拍手波粼粼款乃撼動人間春

秋山圖

前年放船九江口秋風獵獵吹蒲柳買魚沽酒待月明
不知江上青山走三更吹笛欲喚人溥溥白露侵衣巾

故鄉遙遙書斷絕空見過雁如飛雲去年却下七里灘
秋水滿船秋月寒子陵先生釣魚處荒臺直起青雲端
先生不受漢庭官自與山水相槃桓至今高節敦廉頑
清風凜凜誰能攀泊舟登岸行復止徑雙岐通草市石
林遠映樹青紅正與今年畫相似茅廬半住林木裏白
狗黃雞小如蟻翁媪無言童稚間可是太平風俗美清
水初落魚鱗新東鄰釀熟呼西鄰相牽相把意思真親密
不異朱陳民李端筆力能巧妙寫我舊日經行到豈是
欽定四庫全書

竹齋集
卷下

六

老夢眩水墨不覺掀髯發長嘯殷家大樓滄海頭留我
十日風雨秋觸景感動客邸愁便欲卜菜山之幽斷橋
流水無人處添種梅花三百樹直待雪晴冰滿路騎驢
相逐尋詩去

送無咎遊金陵兼簡丁仲容隱君

長松撼空風怒號門前大水推斷橋山中坐雨六十日
不知野草如人高今晨出門天氣好眨眼忽驚春事老
楊花散作雪滿溪送客俄然動懷抱金陵六朝古帝都

古時風景今何如
珊瑚無根土花碧
露團玉樹生流珠
江山無人隔塵土
丹鳳不來孤燕語
上人脫洒無滯留
抵用登臨重懷古
世人往往乘險機
老我白髮無能為
道甫問訊丁令威
有鳥有鳥何如歸

松雪畫馬圖

玉堂學士金閨彥
磊落襟懷書萬卷
等閒貌出天馬駒
鬃鬣蕭梢氣雄健
蹄如削玉耳削筒
目光炯炯磨青銅
五花連錢雲影動
噴沫一嘯生長風
我昔曾上桑乾嶺

欽定四庫全書

竹齋集
卷下

七

帶甲騎來霜月冷
只今潦倒巖谷間
展卷令人動深省

江山漁隱圖

隔江青山青欲流
江雲洗盡江風秋
幽人小艇江上游
碧波萬頃無白鷗
我知幽人愛瀟洒
豈是機危鷗不下
浩歌喚酒來船頭
笑殺桃源種桃者

送暨陽同知

我生山野毛髮古
不是多時舊巢許
松根坐卧忘歲年
足跡何曾入官府
雨晴忽覺草添肥
春來春去都不知

耕田鑿井亦足樂短歌長嘯隨所之溪谷無塵人事少
縱有饑寒能自保花村月夜犬不驚可是太平風俗好
昨日柳花如雪飛今日作詩何所思我詩似質朴君政
從可推錦衣翩翩馬如練拜恩應到黃金殿他年阜蓋
下蓬萊更與君侯作佳傳

錢塘紀行

廢苑荒涼官樹老春雨濛濛長芳草翠石玲瓏蝕毒地
土花亂貼榆錢小猶憶建炎南渡時五雲護擁蛟龍旂

欽定四庫全書

竹齋集
卷下

金輿玉輦事游幸名花不待東風吹紫霞蒲萄動春浪
腰鼓騰雷盤錦杖千官景從軒冕入歌聲婉轉青天上
閭闔新啟銅龍樓長江萬里為鴻溝中原北望草木秋
王孫不識山河愁垂衣東南成至治百五十年真夢寐
只今往事漫蒿萊文物衣冠俱掃地西湖水昏迷釣船
南屏月冷啼杜鵑咸平元祐事茫然梅花楊柳俱忘言
鄂州老將呼不起石塔如壺枕江尾行殿白日古燐飛
游子無言淚如水

漆樹行

東園漆樹三丈長綠葉花潤枝昂藏蟲蟻不食鳥不啄
皮膚破碎成瘡瘡野人摩撫重太息受辱匪因臨道旁
九天降氣疏澁液大家小家來取將陶盆紙籠攢待滿
手中白刃磨秋霜况兼時令值肅殺苟無正性安敢當
所願天下盡光澤豈辭一身多損傷君不見西郊樗櫟
百尺強薜荔裹縛螻蟻房此物安可升廟廊

癸巳春二月下泚客有過余草堂出示李

太守之詩余奉而誦之已而問曰太守何如也
客曰太守公平正大和易近民而民歸之蒞政
未暮月上官委守城郡帥吾民從之民之從有
如子之趨父事也迨今歷三時犯霜露與民同
勞苦城將完上官禮之鄉民德之歌頌之聲不
絕真有古賢人之心誠吾民之父母也余聞客
言喜而歎曰何斯世而有斯人也耶且今之輔
世長民行古之道者鮮矣以古之道化今之人

者為尤鮮吾太守有古人心行古之道能
化今之人真可謂不世出之才矣余鄉民也
間太守之風起敬起慕遂寫梅作歌以上雖
不能紀功德之萬一亦可以述鄉民頌公之

政云爾歌曰

草堂昨夜春風起萬樹梅花月如水相過誰解論襟期
吾州太守山東李太守自是文章公文章政事皆從容
長身玉立冰雪胸標致政與梅花同梅花清苦良自守

欽定四庫全書

竹齋集
卷下

+

不逐尋常好花柳廣平心事抵須論太守自是調羹手
我知太守節義高混同版築非徒勞版築乃是宰相事
濟川舟楫隨時操他日功成賦歸去溪山風月情如故
安得載酒草堂來歲寒同看梅花樹梅花別有天真趣

題申屠子迪篆刻卷

重刻繹山泰碑二
石於紹興路學

我昔聞諸太古初馮翊官官安可摸自從庖羲得龍馬
奇偶變化滋圖書結繩之政由此毀蝌蚪鳥跡紛紜起
後來大小二篆生周稱史籀秦誇李只今相去幾百年

字體散漫隨雲烟岐陽石鼓土花蝕繹山之碑野火然
縱有秦銘刻岑石冰消雪剝無踪迹書生好學何所窺
每展史編空歎息樊山先生東魯儒好古博雅耽成癡
八分小篆純古法鑿石置之東南隅白石光芒爭照耀
滿城走看嗟神妙向來傳寫何足珍棗木空貽後人誚
徐公手摹烽火塵金陵近刻殊失真那如此本意態淳
丞相李斯下筆親申屠墨莊有傳授法度森嚴非苟苟
豈惟後學得所師萬世千秋垂不朽

欽定四庫全書

竹齋集
卷下

十二

雪中次韻答劉提舉

朔風撼天雲黯黯雪花恰似楊花糝憑高無以辨青紅
四海九州同一覽枯腸頗恠酒力薄勁氣著人寒慘慘
痿痺不覺手足彊爭戰俄驚牙齒噉上天下地無痕瑕
萬路千岐迷坎塹山林隨處見梅花汀渚殊難認蘆葦
東郭先生氣宇清南征老将顏色黧蒙鞞誰剝猛虎皮
摘珠競探驪龍頷黃河鐵牛僵欲倒取而啖之吾豈敢
且將清夢托楮生焉用栖身重毳毳踈狂夜起不著巾

短髮正如童子髡開牕忽見四山入月色爛森銀茁茁
玉壺凍結花漏溢戍鼓轉更聲統統此時忽想括蒼翁
應是清冰生肺膽興酣直上百尺樓天上星辰必親擊
平生自有澄清志要使齊民無穢掩殺奸除暴盡忠義
坐令豺鯁成齏醢夫何混雜草木中冰團沍合銜悽愴
不如買却金豪曹且置蒲萄千百坎君歌我和縱高情
痛掃華腴歸古淡無知笑殺楚三閭安用離騷寄悲感

江南婦

欽定四庫全書

竹齋集
卷下

十三

江南婦何辛苦田家淡泊時將暮敝衣零落面如土饑
彼南畝隨夫郎夜間績麻不上床績麻成布抵官稅力
田得米歸官倉官輸未了憂枵腹門外又催私債促大
家揭帖出陳帳生穀十年還未足長兒五歲方離手小
女三周末能走社長呼名散戶由下季官鹽添兩口舅
姑老病毛骨枯忍饑忍寒蹲破廬殘年無物做慈孝對
面冷淚空流珠燕趙女兒顏如玉能撥琵琶調新曲珠
翠滿頭金滿臂日日春風嫌酒肉五侯七貴爭取憐一

笑可得十萬錢歸來重藉錦繡眠羅帷暖擁沈麝烟

送人上燕

燕山三月風和柔海子酒船如畫樓丈夫固有四方志
壯年須作京華遊京華名花大似斗看花小兒競奔走
蒲萄嫩澀金叵羅羊尾駝峯膩人口知君慷慨非膏粱
生銅卧匣韜光芒出門一笑頗自許光範不用投文章
玉露紅門天尺五要為蒼生說辛苦得時便覓好官歸
行道當依聖明主我將細釀松花春明年此時當遲君

欽定四庫全書

竹齋集
卷下

遲君不問宦途事要知伊傳何如人

陌上桑

陌上桑無人采入夏綠陰深似海行人來往得清涼借
問蠶姑無个在蠶姑不在在何處聞說官司要官布大
家小家都捉去豈許蠶姑獨能住日間績麻夜織機養
蠶種田俱失時田夫奔走受鞭笞饑苦無以供支持蠶
姑且將官布辦桑老田荒空自歎明朝相對淚滂沱米
糧絲稅將奈何

大醉歌

明月珠不可襦連城壁不可舖世間所有皆虛無百年
光景駒過隙功名富貴將焉如君不見北邙山石羊石
虎排無數舊時多有帝王墳今日纍纍蟻狐兔殘碑斷
碣為行路又不見秦漢都百二山河能險固舊時宮闕
亘雲霄今日原田但禾黍古恨新愁迷草樹不如且買
蒲萄醕携壺挈榼間往來日日大醉春風臺何用感慨
生悲哀

欽定四庫全書

竹齋集
卷下

古

江南民

江南民誠可憐疫癘更兼烽火然軍旅屯駐數百萬米
粟斗直三十千去年奔走不種田今年選丁差戍邊老
羸饑餓轉溝壑貧富徭役窮熬煎豺狼左右虎後先况
爾不肯行楮錢楮錢不行生禍愆官司立法各用權生
民自此多逃邈君不見海東風起浪拍天海中十載無
漁船人不见淮南格鬪血滿川淮北萬里無人烟通都
大邑盡燹邇新鬼舊鬼皆銜冤今上聖明宰相賢政如日月

開堯天大布德澤清八埏百辟忠義何以言捐生棄死
非徒然我在畎畝心拳拳無能與爾扶顛連老眼迸淚
如飛泉

花驢兒

戊寅歲杭州有回回人收花驢兒能解人意
能識省回回人語言人多觀之回人以此多
獲利焉

花驢兒渡江踏遍江南土正值江南無馬時驢兒得志

欽定四庫全書

竹齋集
卷下

十五

雄威武況是能解花門語江南淫雨二百日洪濤巨浪
掀天舞麻麥爛死秧苗無百姓吞聲苦饑苦驢兒嚼粟
恬如故江南子弟不曉事擲金馳逐爭先覩誇渠省得
人語言縱使能言亦何補花驢兒乃奇遇昨朝方上評事
廳今日又登丞相府哮吼縱橫誰敢侮老夫平生不信
惟見此惟事欲嘔吐歸來十日不食飯扼腕攢眉淚如
雨

過山家

松風吹涼日將宴山家蒸梨作午飯阿翁引孫牽犢歸
破衣垂鶉不遮骭勾鑣挿腰背負薪白頭半岸烏葛巾
喜渠胸次無經綸白石爛煮空山春見我忘機笑古怪
不學當時野樵拜自言無處著隱居僅得門前溪一派
好山兩岸如芙蓉可濯可漁白日力作夜讀書鄰家鄙
我迂而愚破瓶無粟妻子悶更采黃精作朝頓近來草
廬無卧龍世上英雄君莫問

宣和殿畫水仙鵲圖

欽定四庫全書

竹齋集
卷下

十六

玉宇瓊樓天窅窅春融紫禁烟花繞龍光搖動五色雲
忽覺青蒲生野草河圖埋沒龍馬藏上林桑穀一夜長
丹穴豈是無鳳凰鵲乃來天子堂春秋筆削以為異
未必宣和知此意長白山下風蕭蕭吹暗沙塵塞天地
宮中仙子羅衣垂露傾金盞愁欲悲綠烟不開花夢冷
此時顏色非曩時轉首桑田變滄海景物淒涼畫圖在
江南江北不相知展卷令人空感慨

喜雨歌為宋太守賦

南州六月旱土赤炎官火傘行虛空田疇圻裂河海涸
萬物如在紅爐中桔槔不用計已枯農民踏踏愁歲凶
蓬萊太守民父母下顧赤子心忡忡罄竭精神扣天府
話語直與天神通須臾喚起龍井龍大澍三日蘓罷癘
百姓喚作太守雨東臯西陌皆冲融禾苗陡覺充秀實
野草亦解回顏容吾儒能效東哲賦喜見屋底山雲濃
隣家父老走相報門前大水如奔洪妖氛穢穢俱洗盡
此是太守造化功太守正與造化同百姓拍手歌年豐

欽定四庫全書

竹齋集
卷下

十七

歌年豐太守德澤垂無窮

送林叔大架閣上京

林君家世重詩禮冠蓋東南官濟濟三年參幕小蓬萊
爛漫文章照山澁自公退食趣有餘好古博雅耽文儒
牙籤玉軸照窓几名花翠竹羅庭除開簾放春景物俱
湖山四面如畫圖掀髯長嘯塵事少神仙官府真吾居
轉首京華天尺五暫離堂前彩衣舞青驄馬嘯楊柳風
黃河水落桃花雨天上故人相笑迎碧蒲萄酒滿盞傾

忘形爾汝恣歡謔連床可話燈窓情省臺求賢張治具
知君快展青雲步有懷若問草堂翁門外梅花三百樹

題墨梅送宋太守山東運使

大唐丞相宋廣平文章事業昭汗青心腸耿耿磨鐵石
賦梅賦得梅花情嗟哉梅花太清苦不與杏桃同媚嫵
空山歲晚人迹稀縱有清香為誰吐蓬萊太守丞相孫
愛梅亦與梅為隣冰雪滿懷不染塵坐令陰谷回陽春
羅浮山遠雲水隔瑪瑙玻璃霜月白南枝瀟灑北枝清

欽定四庫全書

竹齋集
卷下

六

野草間花驚德色蓬萊太守詩夢回霜華點點飛瑤臺

玉堂早報消息好天子又喚調鹽梅

有感

春風花開洛陽縣此處與子初相見亂離相去五十秋
我鬢星星子皴面莫言今日重淒涼且說當年與華宴
細腰皓齒供奉歡金鼎玉盤羞美饌尊前貴客覓大書
左右從官催進絹一時豪放無檢束人立下風爭健羨
而今此興竟蕭條但見長江淨如練寒烟衰草蓬萊宮

冷月淒風廣寒殿喚鷹羌郎聲似雷騎馬小兒眼如電
總如無知癡騃子也逞虛威捩弓箭老儒有識何以為
空指雲山論文獻君不聞一從趙高作丞相吾道凋零
如韮線

題陳象賢竹素圖

君家竹素園異彼篔簹谷插架牙籤三萬軸卷藏東觀
吞天祿清風明月時往來紅塵不墮香芸堆蚪蚪鳥跡
一玉開懷幽抱密真竒哉炙汗不流珠光重信知龍種
皆書種黃鍾聲徹鳳皇嘯玉杯光燄麒麟動十年不下
君子堂燈火夜靜聲琅琅歲寒節操固自常厭看花柳
爭春忙金谷平泉暗烟雨兔麥孤葵無定主何如竹素
園簡編且容與玉振金聲千萬古

寄太素高士

我昔扁舟上耶溪尋君直過丹井西長松月冷啼子規
春風滿地芳草齊樓殿玲瓏金碧涌鐘雲不出松雲重
老猿掬澗山影亂翠禽啄露岩花動此時相見不作難

握手笑上松花壇壇下十萬青琅玕空陰漠漠常風寒
我對青山論今古青山茫茫無一語知其與我忘爾汝
石瓢酌我雲根亂冷然使我肝膽清飄裾欲度浮雲輕
千峰回影陷落日萬壑欲盡松風聲回首溪山忽成別
幾見江梅飛白雪洞庭湖上聽夜雨仲宣樓頭望明月
斢斢對景傷古情寸心欲吐書難憑何當相晤一抵掌
與君細看真蘭亭

寄昱東明

欽定四庫全書

竹齋集
卷下

十

浮清閣上山如簇浮清閣下泉如玉浮清主人瘦如竹
襟懷卓犖無點俗相逢一笑不話禪自道住山三十年
石杯酌茗搜我枯石牀掃苔留我眠雲深不聽雞戒曉
山風落澗松花老歸來耕田忘歲時池塘幾度生青草君間
一尺素我老雙鯉魚共此片月光各在天一隅昨夜扁
舟欲飛去雪雲凍隔耶溪路千巖萬壑不可尋夢魂空
繞長松樹

悲苦行

悲風吹沙墮空屋老鳥號鳴屋上木誰家男子從遠征
父母妻孥相送哭哭聲嗚咽已別離道旁復對行人悲
去者一心事悲者百感隨前年鬻大女去年賣小兒皆
因官稅迫非以饑所為布衣磨盡草衣折一冬幸喜無
霜雪今年老小不成羣賦稅未知何所出昨夜忽驚雷
破山北來暴雨如飛湍此時江南正六月酸風入骨生
苦寒東村西村無火色癡雲著地如墨黑瞶翁瞽嫗相
喚忙屋漏床床眠不得開門不敢大聲語門外磨牙多
欽定四庫全書

竹齋集
卷下

五

猛虎自來住此十世餘古老未嘗罹此苦我感此情重
歎吁不覺淚下沾裳裾安得壯士挽天河一洗煩鬱清
九區坐令爾輩皆安居

猛虎行

去年江北多飛蟲今年江南多猛虎白日咆哮咋行人
人家不敢開門戶長林空谷風颼颼四郊食盡耕田牛
殘膏賸骨委丘壑觸體嘯雨無人收老鳥銜腸上枯樹
仰天烏烏為誰訴逋逃茫茫不見歸歸來又苦無家住

老翁老婦相對哭布被多年不成幅天明起火無粒粟
那更打門苛政酷折脛斷肘無全民我欲具陳難具陳
縱使移家向塵市破獍狻猊喧成羣

勁草行

中原地古多勁草節如箭竹花如稻白露洒葉珠離離
十月霜風吹不倒萋萋不到王孫門青青不蓋讒佞墳
游根直下土百尺枯榮暗抱忠臣魂我問忠臣為何死
元是漢家不降士白骨沉埋戰血深翠光歛灑腥風起

欽定四庫全書

竹齋集
卷下

三

山南雨暗蝴蝶飛山北雨冷麒麟悲寸心搖搖為誰道
道傍可許愁人知昨夜東風鳴羯鼓髑髏起作搖頭舞
寸田尺宅且勿論金馬銅駝淚如雨

贈蔣清隱

門外好山千萬重翠濤百頃羅雲松細水幽回雜花遠
三逕脩竹來秋風靈籟泠泠動清操世外紅塵飛不到
白月流光抱石臺高人瀟爽長吟嘯起居間趣有餘
看山看水還看書木瓢滿酌示真率不知軒冕為何如

太華終南青未了北山移文為誰道君不見孤竹夷齊
久寂寥首陽薇蕨今荒草

送元本忠北上

天台有奇觀方廣石梁懸斷岸青天倒瀉瀑布寒五百
大士皆頑漢道人一出初無心手翻貝葉開珠林十載
湖山玩清淡白雲流水松風琴金策飛來鏡湖月大禹
山前看禹穴玉塵橫揮簷蔔香石臺花雨如飛雪千山
奇怪總筆底妙語寫出山骨髓岩泉一勺不足留夢魂

欽定四庫全書

竹齋集
卷下

三

飛渡魚龍海皇州三月花柳輝江南此時茶笋肥君行
已随心所向不嫌杜宇啼春歸玉堂故人知我有問信
向君應合手為言百事不能為舊時黑鬚今白首

有感

江南古客無寸田半尺破研輸租錢好山好水難賣緣
荃房日薄蒙荒烟囊中蚪蚪二百年大經大法垂幽玄
他人不知我自憐落花春暮啼杜鵑杜鵑啼苦山竹裂錦官
宮殿烟霏滅人間百鳥無處栖青蠅貝錦成行列北望

茫茫莎草黃
蔥河五月天
雨霜岐陽不見真
鳳凰山鷄
野鷺爭文章
江南古客苦無計
却向水中舉
薜荔沙鷗
夢老蘋雨殘濕
雲不動天如醉
回觀蓬萊十二樓
我曾讀書樓上頭
樓前平碧千頃秋
白露暗洗芙蓉愁
歲寒歸來有誰在
青松是兄梅是弟
山中巢許不可尋
却對老嵇食石髓

蝦蟆山

在海口石狀如蝦蟆前古傳言為太倉之耗令下鑿去石口其鑿遂消然此怪

事非吾儒所道比興賦之以記時事云

欽定四庫全書

竹齋集卷下

十四

春風吹船着牛輓

牛輓潭在蝦蟆山下

扶藜直上山之脊
山上老

石怪且頑皮膚皺皺苔花碧
我來不知石有名拊摩怪
狀心亦驚野人指點為我說
此物却是蝦蟆精古昔曾
偷太倉粟三百餘年耗中國
天官燭其陰有毒勅丁破
口剗其足至今突兀留山丘
雨淋日炙無人牧樹根穿
尻蛇入肚老鴉啄背狐糞頭
牧童時時放野火耕夫怒
擊樵夫剝自從殘墮不能行
見者唾之間者罵蝦蟆蝦
蟆非令僕無功那竊天之祿
如今蝦蟆處處有天官何

不夷其族致令驕氣吹臊腥干霄上食天眼晴百蟲啗
盡心未已假作鼓吹怡人情三月江南春水漲紆青拖
紫爭跳浪漁父持竿不敢言獵夫布弩空惆悵黃童白
叟相引悲田中更有蝌蚪兒

金陵行送余局官

李白題詩舊遊處桃花楊柳春無數六代衣冠委草萊
千官事業隨烟霧大江西下秦淮流石頭寂寞圍荒丘
原田每每盡禾黍青山不掩諸公差高樓如天酒如海

欽定四庫全書

竹齋集
卷下

五

觸景令人生感慨紅墮香愁燕子飛風流王謝今安在
我欲去尋朱雀橋淡烟落日風蕭蕭交疏結綺杳無跡
但見野草生新苗小兒紛紛競豪縱區區割據成何用
芙蓉水冷燕支消千古繁華同一夢傷今弔古如之何
頭上歲月空蹉跎君行喜有絲五紵宦情不似詩情多
江南故事可知否白雲靈靈變蒼狗休論平生錦機手
浩歌且醉金陵酒

天台行

東南海濶秋無烟天台山與天相連丹霞紫霧互吞吐
重岡複嶺青盤旋怪石長松磊磊兮落落神芝靈草綿綿
兮芊芊金堂玉室異人世桃花流水春娟娟送君此去
意何古幅巾颯颯衣翩翩檄書初開雲五色不嫌坐上
寒無羶我擬尋真拾瑤草在家作想三十年乘風幾欲
鼓舞去水流花謝難黃綠山空無塵明月冷時復夢裏
聞清猿君今登登玉霄近為我問訊丹丘僊丹丘僊人
如有在我欲往受長生篇爛煮白石松下眠

欽定四庫全書

竹齋集
卷下

二十六

索笋長句寄傅隱居

春風吹起石底雲豐隆喚出蒼龍孫古苔初破土膏滑
露華淨洗龜筒痕先生愛笋如愛玉冷笑人間飫膏肉
我生無家懷此君十年未解求一束先生卜築江之干
軒窓蕭洒鳴風湍玉塵不揮秋颯颯翠佩欲動聲珊珊
高歌不覺凜毛髮坐令異境生清寒便欲契青奴謝彼
苜蓿盤先生若肯慰我之大嚼我亦為之披腹呈琅玕

望雨

狂風吹春無寸雨天地漫漫盡黃土病日韜光赤如血
千花萬花愁不語耕牛渴死野草枯農夫悲啼淚如珠
蠶胎在紙秧在穀未知何以供官輸道旁流民盡游鬼
十日不食一粒米唇焦口燥聲啾啾抱甕沿門求剩水
孰云綺席羅奇珍龍涎入鼎烟如雲笙歌滿耳珠翠擁
醉飽那識人間貧江北豺虎毒又見江南狼虎簇饑狐
日食餓死屍老烏夜叫逃亡屋我冠腐儒空讀書騎馬
小兒真苟圖安得銀河傾澤我枯槁蕪坐令四海常晏
如

欽定四庫全書

竹齋集
卷下

七

感竹吟

雲溪老竹持苦節玉質蕭森出巖穴蒼蒼古色誰為摩
凜凜清風自然別勁直不肯降雪霜瀟洒不肯栖鳳凰
願殺長身載經籍要為吾道垂休光誰信囂風滿滄俗
紅紫紛紛亂人目遂令此君受羈束荆棘凌夷刀鋸辱
青蟲網葉蠹食筠野老更欲鉏其根閉塞陽和絕土脉
絕之不許生兒孫東里先生有遺族午夜聞之皆痛哭

擬以餘音問伯夷首陽烟雨莓苔綠嗚呼老竹老愈奇
歲寒心事無人知孤梅在溪松在壑焉能與余論襟期
飄聲夜落山陰道欣賞多情愁欲倒固知遇合各有時
何必區區掛懷抱君不見窮陬荒草非所種開花猶解
供王貢那有此材無此用

結交行送武之文

江南野人毛髮古騎牛讀書無一侶白眼遙看泰華雲
赤脚冷濯滄浪雨長安小兒不足數論文忽有東平武

欽定四庫全書

竹齋集
卷下

六

武君胸中氣崢嶸呼吸雲夢吞滄溟筆底春秋決王伯
坐探今古無餘情青春揚舲渡淮海江山秀色遙相待
雄文卷盡九江碧新詩寫出廬山翠西南五老青未了
倏忽騎雲過蓬島脫畧不作公子行隨我騎行踏芳草
人怪我顏何醜老自覺無人可同調梅花明月柳花雲
獨對青山發長嘯武君過我笑我癡話言時復投其機
柴床卧聽夜雨落草窓坐看秋螢飛淒涼飲盡客中味
君知我知誰復知今年丙子旱太苦江南萬里皆焦土

老羸餓死壯者逃碩鼠欺人暴如虎武君平生多抱負
對此如何可輕舉武君武君善調護慎勿輕身學巢許
秋風昨日吹大荒草木黃落雁南翔浩然歸興不可降
嚴君五馬一馬黃大兄亦授七品郎况是遷官歸故鄉
可知閭里生輝光我窮衣袖露兩肘回視囊中無一有
送君不勸陽關酒長歌但折江上柳丈夫有志當自持
不須重此生別離淚不為此生別滋天南天北同襟期
明年平原芳草綠試弓好射銜花鹿有懷若問山陰竹
欽定四庫全書

竹齋集
卷下

中天亦有南飛鵠

謝友惠溫生筆

春雲浮空山渺渺細雨飛花墮江草感時欲作寄遠書
凝思幾歎中書老東家小胥借已無西家但有長柄鉏
薛濤側理攤滿案無奈點作玄雲圖昨夜燈花懸紫粟
知有春風到茅屋清晨開戶得故人惠我溫生雙落墨
赤鋒圓健光彩浮金花古牋封兩頭脫穎忽作霹靂響
龍跳虎躍山靈愁更看擔夫爭道好塗鴉小兒驚絕倒

陶泓從此策竒勲
扼腕凝神聽揮掃
黑花颯颯鳴琳琅
野人辟易安敢藏
為君貢之白玉堂
黼黻華袞開天章
大書大義扶王綱

謝曹隱君惠扇歌

去年僦屋在山脚
草居兩間如蠹殼
六月七月無雨落
田野焦枯江海涸
人間酷烈無處逃
吾農忍氣嬰魚熬
編蒲緝羽不成扇
尋松訪石空勞切
至今悵鬱未能雪
想到那時腸內熱
先生何以知此情
贈我齊紈比明月

欽定四庫全書

竹齋集
卷下

三

番羅夾背紫竹把
中有水墨新圖畫
崩灘亂石奔驚湍
依約遠山左右攢
輪囷老柏飽雪霜
更有石丈依修篁
歲寒節操不可降
未舉已覺生清涼
山陰野人何磊落
笑引南薰歸掌握
寒聲颯颯動巖壑
不羨右軍題六角
轉手黃埃淨如掃
便將獻君明大道
置諸懷袖揚仁風
快與蒼生除熱惱

贈楊仲開畫圖引

楊君綽有隱者風
鬚長骨瘦兩耳聾
作詩作畫不作意

造化不與常人同前年眼健腕有力捉得老龍歸雪壁
墨雨淋漓天地黑茅山十日飛霹靂去年神固氣宇壯
長驅猛虎來堂上威雄哮吼萬夫栗滿屋生風洗蠻障
今年忽爾寫雁魚氣韻又與曩日殊平湖大澤無界限
黃蘆白水秋烟孤魚游不失倫鴈來不失序飛鳴泳躍
千萬狀立意俱由是為主嗇夫一見大義明無聲詩是
無文經今人幾許浪得名豈研古人之畫情楊君楊君
一笑起無奈賤目而貴耳宋人固以燕石奇夫差酷愛
青天障請君畫作風調雨順圖共樂太平歌擊壤

賈浪仙騎驢圖

雪花打帽風攪鬚寬衣破靴騎蹇驢先生自是山澤癯
瘦名之傳豈為虛窮吟苦思不覺老知音幸遇韓京兆
至今長安諸小兒拍手猶能為君道清聲千古在世間
好詩句句誇浪仙我恨後生五百年不得抵掌談微玄

形骸孤陋向巖壑竹冠草衣空卓犖披圖挹之嗟寂寞
斷橋流水梅花落

柯博士畫竹

湖州老丈久已矣近來墨竹誇二李紛紛後學爭奪真
畫竹豈能知竹意奎章學士丹丘生力能與丈相抗衡
長鯨大楮縱揮掃高堂六月驚秋聲人傳學士手有竹
我知學士琅玕腹去年長歌下溪谷見我忘形笑淇澳
我為愛竹足不閒十年走遍江南山今日披圖見新畫
欽定四庫全書

竹齋集
卷下

三

乃知愛竹亦如我何當置我於其下竹冠草衣相對坐
坐嘯清風過長夏

秋夜雨

秋夜雨秋夜雨馬悲草死桑乾路雁啼木落瀟湘浦聲
聲喚起故鄉情歷歷似與幽人語初來未信鬼啾唧坐
久忽覺神淒楚一時感慨壯心輕百斛蒲萄為誰舉山
林豈無豪放士江湖亦有饑寒旅凝愁擁鼻不成眠
孤焰短寒花吐秋夜雨秋夜雨今來古往愁無數謫仙

倦作夜郎行杜陵若為茅屋賦只今村落屋已無豈但
屋漏無乾處凋餘老稚匍匐走哭聲不出淚如注誰人
知有此情苦秋夜雨秋夜雨赤縣神州皆斥鹵長蛇封
豕恣縱橫麟鳳龜龍失其所耕夫釣叟意何如夢入江
山毛髮豎余生聽慣本無事今乃云胡慘情緒排門四
望雲墨黑縱有空言亦何補秋夜雨秋夜雨何時住我
願掃開萬里雲日月光明天尺五

送章德遠教官自湘湖歸慈湖

欽定四庫全書

竹齋集
卷下

三

我生不想圖凌烟草衣曲肱牛背眠早看紅日出海底
夜看素月懸中天陰陽推盪幾昏曉長嘯狂歌不知老
清泉白石自愉怡那信人間宦途好逍遙偶爾窮外觀
之子已在青雲端廣文坐上新彈冠蕭爽不作儒生酸
三年考績易官燭回首西風正黃菊白雲喜動故山秋
慈湖遙映湘湖綠君歸莫慮鐵研穿且力古道希聖賢
我歸不用君致言門前自有梅花田

送歐陽彥珍歸杭

金陵山勢如蟠龍金陵美酒玻璃紅對山酌酒却歌舞
坐笑前輩何英雄六朝遺跡漫烟霧鳳凰臺上秋無數
斜陽巷陌燕子飛秦淮西下長江去人生此會不偶然
眼前興廢何須言丈夫事業要磊落比較瑣屑非高賢
我知歐陽乃奇士喬木故家良有以文章五彩珊瑚鈎
肺腑肝腸盡經史盛時仕宦三十年東吳西楚情翩翩
解衣推食待豪傑氣義渾厚無雕鏤明朝乘興過南省
鶴背秋聲破秋溟紫薇花對明月高呼吸湖光數千頃
為我載酒尋梅花

欽定四庫全書

竹齋集
卷下

三

書生瀟洒未有家擬欲結屋青山阿故人若有歲寒約

趙千里夜潮圖

去年夜渡西陵關待渡兀立江上灘灘頭潮水倒雪屋
海面月出行金盤水花著人如撒霰過耳斜風快如箭
叫霜鴻鴈零亂飛政似今年畫中見寒烟漠漠天冥冥
展玩陡覺心神清便欲吹簫騎大鯨去看海上三山青

明上人畫蘭圖

吳興二趙俱已矣雪窓因以專其美不須百畝樹芳菲
霜毫掃動光風起大花哆唇如笑人小花斂媚如羞春
翠影飄飄舞輕浪正色不染湘江塵湘江雨冷暮烟寂
欲問三閭杳無迹愴懷不忍讀離騷目極飛雲楚天碧

古時歎

箕子奴而比干死屈原以葬湘江水痛哭書生不見歸
朱董何人呼得起深衣大老為腐儒紈袴小兒稱丈夫
學士時為八風舞將軍日醉千金壺人間赤子苦鉗鈇
抱麟反袂空流涕嗚呼噫嘻不有祝鮀之佞宋朝之美
難乎免於今世矣

送汪用衡北上

去年送客西湖路芳草落花春已暮今年送客浦陽江
六月秋風吹柳樹年年送客為賦詩賦詩每以功名期
玉堂金馬等閒去朱衣紫綬笑取之歸來高卧良自鄙
此語云云成戲耳相如不是輕薄兒馬周終非窮途士
古人窮達各有守令人朽然何所有百寶粧腰逞豪俊

千金買馬誇疾走春風笑看陌上花
夜月醉眠蛾眉家
平生事業止于此旁人為爾何咨嗟
汪君汪君拔其萃
讀書論道真我輩江山萬里在胸中
洗却人間紈綺態
此行必奪錦袍歸腕頭更佩金纍纍
若問今朝作詩者
竹冠草衣盤礴羸商歌飯牛松下坐

老柏圖為張心田賦

高堂素壁無纖埃上有老柏參天來
銅柯旁奮龍爪出
密葉暗擁玄雲堆江干水落見白石
小竹無聲弄秋碧
君不見劍峰低空絕行跡葛祠前
二千尺霜皮溜雨
苔花蝕至今父老猶能識

欽定四庫全書

竹齋集
卷下

三

雲麓漁舟圖

大山小山無寸青長江萬里如月明
楚天不盡鳥飛絕
老樹欲動風無聲何人方舟順流下
草衣箬笠俱瀟灑
蓬舟有兒能讀書不是尋常釣魚者
玄真子陶朱翁避
世逃名俱已矣後來空自談高風
我視功名等塵垢何
似忘言付盃酒武陵豈必皆神仙
桃花流水人間有

對月

已卯八月十五夜天地萬里無雲烟明月忽自海底出
皎如玉鑑當空懸清輝灑灑破幽冥山河倒浸無餘景
丹桂香消白兔愁玉宇瓊樓不禁冷南箕北斗潛光華
江漢無聲流素波老夫於此興不淺有月無酒將奈何
天上誰觀羽衣舞人間那得清虛府世情乖異每變更
月色何嘗有今古秋風飄飄度瑩篔東家西家登大樓
相期翫賞醉終夕豈知別有窮途愁回首天涯故人少

欽定四庫全書

竹齋集
卷下

三七

白露淒淒下庭草欲持此意問嫦娥孤雁一聲關塞曉

芙蓉山雉圖

錦屏重重錦官宮錦官宮苑多芙蓉芙蓉花開仙子容
滿城歌館延秋風秋風吹涼度江許江上月明人笑語
舉頭無限是青山富貴繁華定何許風雲變滅事已非
西宮南苑殊曩時荒臺野草氣慘慘翠筠冷雨秋離離
日暮簫聲動霄漢山雞起舞雲零亂孤懷回首不勝情
對酒令人發長歎

題溫日觀葡萄

日觀大士道眼空佯狂自喚溫相公浩然之氣塞天地
書法悟入蒲萄宮有時潑墨動江浦叱喝怒罵生風雨
草聖絕倒張伯英春蚓秋蛇何足數龍鬚倒捲鬼眼枯
枯藤脫落無根株多年明月喚不下爛葉搭架秋模糊
流沙渡頭聽鼉鼓滄海桑田事非古大士於此不露機
示人落落離言語只今相去數十年看書看畫心茫然
安得美酒三百船與君大醉西湖天

欽定四庫全書

竹齋集
卷下

息齋雙竹圖

李侯畫竹真是竹氣韻不下湖州牧墨波翻倒徂徠山
筆鋒移出篋管谷千竿萬竿清影遠百丈十丈意自足就中
分取一兩枝別是山陰瀟洒族踈梢颯颯鳳毛顫修幹
隱隱虬龍伏憑軒忽若秋風來坐使傍人脫塵俗我生
愛竹太僻酷十載狂歌問淇澳歸來不得翠琅玕聽雨
冷眠溪上綠而今已斷那時想見景何緣動心目便欲
為園真致之相對空窓慰幽獨

題金禹瑞畫松圖

畢宏韋偃遠莫追畫松得名今是誰黃巖太守誇絕倒
休寧縣令爭新奇蒼髯鐵甲風雷動浮雲散盡青天空
只因曾看讀碑圖至今多作營丘夢錢塘有道金隱君
風流不讓今古人文章學古畫師古落筆政似營丘親
前年為我畫松樹自然自有天真趣無人解識棟梁材
冷烟殘雨空山暮于今頽然老矣夫隔江不寄平安書
不得與之傾酒壺令人看畫長嗟吁

欽定四庫全書

竹齋集
卷下

張御史西山雪堂

張君住近西山麓窓几虛明遠塵俗懸崖絕壁堆瓊瑤
疊嶂重巒隱青綠乾坤蕩蕩無痕瑕世上兒子何繁華
清高或作袁老夢標致不取陶家茶升高望遠忘世慮
寫字讀書皆有趣歲寒若以我為鄰與爾種梅千百樹
坐令此處春無數

司馬氏藏唐子華山水扇畫

近來山水畫郭熙江南獨數休寧令筆法精奇意態古

咫尺萬里開天鏡巖頭老樹如老龍隔湖喜見山重重
小橋依約野色遠茅廬隱映林影空門前碧硯石頭路
荒苔野草青無數往來不見車馬塵政似山翁舊居處
程伯休父司馬孫風流文彩垂青門平生愛書入骨髓
尺素寸楮無不存我生所好亦殊絕一見此圖狂欲跌
安得為招唐令來添我梅花千樹雪

題夏迪雙松圖

我昔曾上五老峯白雲盡處看青松中有兩樹如飛龍

欽定四庫全書

竹齋集
卷下

早

正與夏迪畫者同夏迪畫松得松趣箇箇乃是廊廟具
貞固不持凌雪霜偃蹇猶能吐烟霧蒼髯獵獵如有聲
錢甲半掩苔花青六月七月炎火生對此似覺形神清
丈人兀坐誠有道豈比商山採芝皓有琴屏却不須彈
而今世上知音少

題魏仲遠筠深軒

君家住處多幽趣繞屋琅玕淨無數蕭蕭清韻動天風
冉冉晴陰生綠霧湖山遠映蒼翠稠五月六月涼如秋

且開三徑待佳客抵用千畝論封侯况爾此君高節古
縱有雪霜那可侮平生正直少人知野草間花徒媚嫵
知君古意同古賢脫略傲笑情翩翩我生愛竹比君癖
櫛風沐雨三十年投老歸來舊溪曲竹色荒涼芳草綠
歲寒無以慰孤懷只有梅花在空谷聞君有竹心遑遑
便欲逕造君子堂安能為我羅酒漿月明吹簫呼鳳凰

對景吟

濕雲不飛山雪滿越王城頭鼓聲短曉來溪上省梅花

欽定四庫全書

竹齋集
卷下

三

虎跡新移大如椀老烏縮項如凍鷺呼羣強作嬰兒啼
紅桃翠柳眼欲迷舊時紈袴今塗泥淮南千里無烟火
淮東近日多軍馬寸薪粒粟不論錢行客相者淚盈把
如何五陵年少郎賣田去買青樓娼吳歌楚舞不知夜
歸來也學山翁狂明朝酒醒入官府方知不是城南杜
落花風急雨蕭蕭索寞無言面如土

衛生畫山水

國朝畫手不可數神妙獨數高尚書尚書意匠悟三昧

筆力固與常人殊林樹無根雲懵懂崑崙泰華雲中湧
山城野店不逢人碧波翠嶂淋漓動于今絕響三十年
尚書筆法誰能傳片藤尺青不易得使我感慨
心茫然吳興老趙蘄丘李兩地清風俱委靡古人丹
青亦消毀後學紛紛無乃是衛生卓犖志有餘妙齡
聲譽馳江湖泛觀今昔意未足直與造化論錙銖
嗚呼安得有絹請君畫竹冠置我長松下坐看青山白
雲過

欽定四庫全書

竹齋集
卷下

四二

五馬圖

太僕濟濟唐衣冠五馬不著黃金鞍飲流繫樹各有造
未許便作駑駘者鬃鬣蕭蕭綠雲茸噴沫長鳴山嶽動
世無伯樂肉眼癡那識渥洼千里種官家去年搜駿良
有馬盡拘歸監坊遂令天下氣凋喪驢騾駝爭騰驤
只今康衢無馬迹得見畫圖差可識畫圖畫圖奈爾何
撫几為之三歎息

吹簫出峽圖

巔崖峭絕撐碧空倒卧老松如老龍奔流落峽噴白雪
石角險過百丈洪我昔放舟從此出揆施掛帆氣欲折
春風回首三十年至今認得山頭月草堂清晨看圖畫
畫裏之人間似我波濤洶湧都不知橫簫自向船中坐
酒壺茶具船上頭江山滿眼隨處游安得更喚元丹丘
相携共上黃鶴樓

關河雪霽圖為金陵王與道題

飛沙抄人風墮憤老夫倦作關河客歸來松下結草廬

欽定四庫全書

竹齋集
卷下

四三

卧對寒流雪山白悠悠如此四十年世情脫略忘間關
今晨見畫忽有省平地咫尺行山川鳥道連雲出天險
玉樹瓊林光閃閃陰崖絕壑望欲迷冰花歷落風悽慘
枯槎側倒銀河開三巴春色隨人來漁翁舟子相笑語
不覺已過洪濤堆溪回浦淑石齒齒溪上人家成草市
長林大谷猿鳥稀小步蹇驢如凍蟻西望太白日色寒
青天削出蛾眉山人生適意隨所寓抵須歷涉窮躋攀
明朝攬鏡成白首春色又歸江上柳何如高堂掛此圖

浩歌且醉金陵酒

樊籠雀

野雀不向山林宿如何却傍人家屋山林怕遭羅網圍
人家又恐人驅逐飲啄頻驚殊不足辛苦營巢隨養育
昨日雨狂風拔木人家屋倒巢亦覆雄悲雌泣無所施
墮地最苦黃口兒黃口羽濕不會飛啾啾草底啼渴饑
雄雌啄哺稍覺長無故又被樊籠羈雄雌劬劬繞籠飛
啄哺不異居巢時但恨不得身相依我感此情子細推
人之與物初無違安得開籠而縱之山林朝市俱無疑

欽定四庫全書

竹齋集
卷下

四

廬山行送行

廬山根盤幾百里屏風九疊開畫圖浮嵐吐秀挹南斗
黛色眇眇來青湖山西石門翠如刷山東石鏡大如月
三梁倒掛銀河流六月飛花洒寒雪春風錦繡花玲瓏
彩雲盤結摩霄宮涼回紫極竹聲遠紅塵不到金芙蓉
我昔曾穿謝公屐散策曾尋謝公迹微風弄影松檜鳴
微雨弄晴瑤草碧重巒疊嶂烟淒迷剝苔掃碧尋古題

興闌回首不知處落花流水孤猿啼君作廬山遊攬結
廬山秀拂拭雙瞳人細看蓮花漏轉首白雲如雪飛廬
山面目非當時歸來舊事不須問石田水暖菖蒲肥

孤松歎

孤松倚雲青亭亭故老謂是蒼龍精古苔無花護鐵甲
五月忽聽秋風聲幽人恐爾斧斤辱獨傍孤根結茅屋
月明喜看清影搖雪凍却愁梢尾秃昨夜飛霜下南海
山林草木無光彩起來摩挲屋上松顏色如常心不改
幽人盤桓重慨慷此物乃是真棟梁嗚呼既是真棟梁
天子何不用是扶明堂

痛哭行

雨淋日炙四海窮經綸可是真英雄岐豐未黍泣寒露
咸陽草木來悲風京邦大官飫酒肉村落饑民無粒粟
東魯儒生徒步歸南州野老吞聲哭紛紛紅紫已亂朱
古時妾婦今丈夫有耳何曾聽韶武有舌不許論詩書
昨夜虛雷槌布鼓中天月破無人補休說城南有韋杜

白璧黃金天尺五

苦寒作

昨日風寒枯木折今日五更霜似雪
河伯泉仙驚怪言
凍殺深潭三足鼈南海一平行大輿
五尺之冰千古無
珊瑚樹死日色薄老翁破凍又僵魚
鳳凰不出鸚鵡語
禿鷲飛啼血如雨駝馬交馳入不毛
兜蓋不憚饑寒苦
豺狼夾道狐兔驕白草萬里蠻烟焦
紛紛赤子在魚炙
三士何緣爭二桃君不見江南古客
頗癡懶養得一雙

欽定四庫全書

竹齋集
卷下

五

青白眼

送吳瑞卿歸武昌

古越古為山水府篁竹菁菁無嘯聚
耕田鑿井各有為
文物衣冠比鄒魯玄風已散茫茫然
幾回滄海成桑田
眼前飛走禰臬獍草木憔悴愁無天
君來推轂洗煩毒
晝簾不動風肅肅荆花脫洒春攸揚
一奩清透湖天綠
赤子欣欣行大道拍手爭歌君政好
明月冷浸甘棠陰
光風碧長園扉草三載考績鷹脫鞴
解鞍出買江上舟

黃童白叟不可留山風慘澹江風愁十里長亭正花柳
綠波翻動蒲萄酒玉笙吹徹蓬萊雲西去青山如馬走
知君住處好神仙洞庭赤壁浮紫烟武昌樊口最幽絕
東坡曾為留五年君今歸去榮畫錦水色山光緣席枕
我亦欲寫巖壑圖掛君高堂對君飲

送黃叔源之甘肅州尹

江風飄飄楊柳青江烟漠漠花冥冥春光潏灑動笙樂
潑醅弄影蒲萄傾客路迢迢平不頗應有兒童迎五馬
文章太守今幾人風流未有如令者中原地古風俗淳
君侯撫牧仁化新黃堂無訟白日靜甘棠有陰芳草春
君侯考績鬢未改虎竹銅符轉光彩功成早向江南來
江南有人遙相待

柯博士竹圖

先生元是丹丘僊迎風一笑春翩翩琅玕滿腹造化足
須臾筆底開渭川我家只在山陰曲修竹森森照溪綠
只今榛莽暗荒烟夢想清風到茅屋今朝看畫心茫茫

坐久不覺生清涼夜深明月入高堂吹簫喚來雙鳳凰

題畫蘭卷蕪梅花

湘江雲盡湘山青秋蘭花開秋露零三閭已矣喚不起
蕪蕪蕭艾春娉婷冷飈吹香散郊垌山蜂野蝶何營營
幽人脫略境色外竟坐不讀離騷經西湖昨夜霜月明
梅花見我殊有情逋仙祠前塵土清老鶴孑孑如人行
天邊縹緲來鳳笙玉壺美酒顛倒傾酒闌興酣拔劍舞
忽覺海日東方生

欽定四庫全書

竹齋集
卷下

四

喜雨歌贈姚鍊師

今年大旱值丙子赤土不止一萬里米珠薪桂水如汞
天下蒼生半游鬼南山北山雲不生白田如紙無人耕
吾生政坐溝壑嘆况有狼虎白日行大官小官人父母
殺犬屠牛事何苟南風日日吹太空旱魃徒勤城南婦
鍊師一出役萬靈綠章上扣天帝庭乞得秋陰三日雨
洗濯山澤回餘青老農額手喜復歎點點都是盤中飯
雨我公田及我私免得殘年坐塗炭老農所見愚又愚

拜師更乞天雨珠雨珠飲彼殘暴腹庶幾活我東南隅
我方熱惱岩壑底眨眼忽聽雷過耳起來發歌登大樓
長江大河都是水

白雲歌為李紫篁作

我歌謫仙白雲歌清風飄飄吹女蘿女蘿風飛白雲出
秦山楚山爭嵯我秦楚之山青欲舞白雲不向湖山住
忘機在我讀書窗要養貞姿歸太素滿山紅紫光陸離
白雲施施自無為奔騰洶湧作霖雨白雲悠悠若無侶

欽定四庫全書

竹齋集
卷下

四

白雲在天不可呼白雲在地不可孤卷舒變滅了無意
粲粲不受纖塵污我與白雲皆幻住白雲與我應同趣
孤飛感我庭闈情回首青山不知處我欲高飛洞庭船
賒月買酒邀謫仙為君喚雪梅花天握手一笑三千年

劍歌行次韻

先輩匣中三尺水斬蛟曾入吳潭裏提歸未肯策奇勳
軒冕泥塗真戲耳雞林削鐵不足比昆吾百鍊安可齒
淬花不瑩鷓鴣膏掉鞘却敲鸞鳳髓憶昔破敵如破竹

帶霜飛渡桑乾曲于今繡澁混鉛刀不遇何異荆山玉
驚雷夜作青龍哭血痕冷剝苔花綠野人一見駭心目
到手撫摩看不足雪花皎皎明闌干毛髮凜凜肝膽寒
老軍疲將長慨歎願欲置諸武庫間書生無用且掛壁
引盃時接殷勤歡天眼太高俗眼頑銳鍔宜許兒曹看
先生有志不在此出處每談徐孺子清高厭覓萬戶侯
笑引江山歸畫史我未四十髻已斑學劍學書俱廢弛
五更聞雞狂欲起何事英雄心未已

欽定四庫全書

竹齋集
卷下

辛

船上歌

草衣老子雙鬢皓拍手夜唱滄浪歌浮生不信巢穴好
賣屋買船船作家明月滿天天在水別調新歌水中起
蕭散可同甫里翁逃名不比鷓夷子大兒船頭學讀書
小兒船尾學釣魚病妻未脫鄉井夢夢中猶慮輸官租
前年揚帆箕子國矯首扶桑看日浴蓬萊可望不可到
海浪翻空倒銀屋去年鼓柁遊瀟湘湘南雲盡山蒼蒼
靈均死處今尚在使我弔問空悽愴今年來往太湖曲

三萬頃波供濯足玉簫吹散魚龍腥七十二峯青入目
脫巾袒裸呼巨觥旁人睥睨笑我狂我狂忘勢亦忘利
坐視宇宙界諸郎君不見江西年少習商賈能道國朝
蒙古語黃金散盡博大官騎馬歸來傲鄉故今日消磨
等塵霧又不見江南富翁多田園堆積米穀如丘山粉
白黛綠列間屋競習奢侈俱凋殘今日子女悲饑寒嗚
呼噫嘻何如尚志富貴足求貴貴足恃秦時李斯丞相
位漢家韓信封侯貴堂堂勲業亘乾坤赤族須臾無噍
類何如老子船上閒朝看白水暮青山艱險機忘隨處
樂顧盼老小皆團團且願殘年飽吃飯眼底是非都不
管興來移棹過前汀滿船白雪蘆花暎

吳姬曲六首

吳姬美遠山淡淡橫秋水玉纖軟轉綰青絲金鳳攢花
搖翠尾隔雲移步不動聲騎馬郎君欲飛起欲飛起樓
上閒人鬧如市

吳姬來香花未動游塵開勾玉遲遲錦雲重百花掩媚

春寒哀王孫公子金無限為君一笑成飛埃

吳姬歌聲未轉歡情多飄然一曲入雲去簷前誰敢
呼琵琶珍羞如山酒如海餘聲襲人無奈何無奈何門
外春風題柳花

吳姬舞翠袖凌雲步輕舉笑回不覓錦纏頭四坐金錢
落如雨雲烟轉首無定期紫燕黃鸝對人語對人語明
年春風誰是主

吳姬醉對面接花作嬌態腰柔頸軟未成眠斜倚東風

欽定四庫全書

竹齋集
卷下

三

說憔悴坐中狂客不勝情笑拍香肩呼小妹呼小妹明
日園林樹如蓋

吳姬歸湖風吹冷日色微滿船箏鼓不敢動隔林恐攪
殘花飛湧金門外馬如練銀燈照水紅輝輝紅輝輝吳
姬上馬羅綺圍

村田樂祭社圖

春風吹晴杏花雨東村西村鳴社鼓長旂翩翩導前路
樂舞于于成隊伍冠帶郎君顏貌古插竹簪花相媚嫵

可是平生慣塵土不學時人靦面目
鬢髻童兒亦靦覷
騎牛老兒妄偃僂
桑柘影斜山日暮
醉飽歸來同笑語
田家之樂樂如許
正是太平無事處
孰知異世多官府
村樂荒涼無此舉
大家役役如征戍
小家戚戚驅兒女
白日康莊猓踰多
黔黎盡作逃亡戶
雲林叢社能識取
撫綏寧信巔崖苦
按圖閱景自悽楚
誰是龔黃誰卓魯

紅梅翠竹山雉圖

游絲冉冉游雲暖
翠石凝香土花短
管絃不動白日遲

欽定四庫全書

竹齋集
卷下

五

可是江南舊亭館
湘簾隔竹翠雨濃
王姬醉染胭脂紅
文章羽毛亦自好
轉首似覺懷春風
去年我過長洲苑
落日淡烟芳草淺
滄浪池畔野景生
姑蘓臺上離情遠
今年買權遊西湖
西湖景物殊非初
黃金白壁盡塵土
朱闌玉砌荒靡蕪
東園寂寞西園靜
梧桐葉落銀床冷
十二樓前蛛網絲
見畫令人發深省

飯牛圖

君不見百里奚飯牛而牛肥
胸中經緯無人知
又不見

老甯戚時不時兮長嘆息偶爾君臣稱際會伯道相高
非盛德何如牧兒原野間埋名隱姓間盤桓清晨騎牛
唱歌出日暮騎牛唱歌還隨時力作了人事豈以世故
無相干也不知長安塵土暗天地也不知滄海風黑波
瀾翻三峽之險彼自險蜀道之難彼自難富貴無所惑
貧賤得自安但願歲年豐草滿牛可餐青山綠水足行
樂吟風嘯月無機關不問世上騎馬官

盤車圖

欽定四庫全書

竹齋集
卷下

七

憶昔常過居庸關關中流水聲潺潺雪花飛寒大如席
白色粲爛西南山山家野店隱烟霧水榭雲樓有幽趣
漢家封侯已消磨秦時長城作行路天險不設南北通
風俗一混歸鴻蒙今人不解古時事使我感慨心忡忡
灤水城頭無首藉馬驢盡食江南粟八月九月朔風高
更有饑鷹啄人肉太平時節無烽塵金輿玉輦從時巡
關南關北草色新四海貢賦來相親大車連屬小車侶
雪地冰天無險阻玉帛穀粟取不窮誅求那信人民苦

書生潦倒家無儲淒涼忽見盤車圖側身悵望長嗟吁
天子亦念東南隅

壽張堂河東張仲舉作記堂乃韓子中父封壽
張尹故名子中居曹州中陶一日其父見井
泉流北即與諸子謀遷居云井水北流河必
北行乃去河六十里卜居高築其堂半年後
河果北流不遷者皆受害獨韓氏堂無恙是
歲子中奉恩封父因題之

欽定四庫全書

竹齋集
卷下

七

廬陵曾記畫錦堂黼黻韓魏開忠良文章足以照千古
富貴豈止榮一鄉壽張新得河東記中陶乃是安陽裔
知幾不獨見井泉自是胸中有天地春風入簾春雨收
下堂不受黃河流綵衣諸郎舞新好奉恩歸拜鬢參謀
衣冠文物能瀟灑不羨老裴居綠野山中自有宰相家
休問桃源種桃者

徙馬歎

君不見秦皇二世治天下趙高妄指鹿為馬遂令衆口

毀權奇異獸須臾滿高價東亭牡騾十萬錢西城牝驢
數百千駟馱駟入奇選犂犢賈勇穹廬前三十六郡
五百萬一旦驚風墮塗炭天閤雲散雨聲寒峻骨累累
秋草爛毳衣健兒牽狗車皮冒女郎隨橐駝將軍怒斬
白鼻騮丞相唾逐獅子花獨留款段在君側錦韉金鞍
青玉勒噴臊撼動赤墀風太僕御官愁失色痛憐物產
不偶時龍媒滅沒其誰知况無古王同爾馳相逢徒作
窮途悲吾聞天馬出西極霜蹄蹴蹋飛霹靂當年堆壁
欽定四庫全書

竹齋集
卷下

五

不敢沽豈料于今供啗食庖羲已矣古道蕪何時重見
滎河圖孫陽已作飯牛客非子去隨牧羝奴嗚呼不獨
馬之委天下奇材亦如是

盆中樹

橐駝已矣樹多病後世誰能諭官政盤根錯節入盆盂
豈伊所生之本性童童結蓋擁綠雲皮膚轉卷生蟲紋
幽人重之如重寶置諸座右同佳賓時時玩賞勤拂拭
要做人前好顏色自憐無路接春風慙愧荆榛得甘澤

人言此樹受恩愛我獨悲之受其害既無所資無所求
何故矯為阿媚態嗟哉木命既有虧其所玩者何為奇
君不見石家珊瑚高且貴今日根株在何地又不見李
家花木比異珍于今野草秋烟昏姚黃魏紫誇艷美看
到子孫能有幾人生所重重有德耳目之娛何足齒我
知萬物各有緣胡不聽之於自然平原太谷土無限樗
櫟能與天齊年此樹那宜此中種器小安能成大用願
君移向長林間他日將來作梁棟

欽定四庫全書

竹齋集
卷下

五七

幽蘭詠

光風吹香洗游塵蘭花隱芳猶笑人翠露沉沉玉環冷
忘言坐視空山春幾回清夢度荆楚欲問三閭杳無所
空將幽意寄離騷暮雲淒墮湘臯雨古懷瀟洒千餘年
忠義漫作虛語傳人間蜂蝶何翩翩撫卷對花空自憐

宣和殿畫驢圖

海波激撞日月動瓊樓玉宇紅雲擁忠良不顧社稷搖
聖明忘却山河重太平將軍倦戍邊春風四海且上元

宣和殿上如市塵黔驢直到君王前黔驢之技止於是
君王用意徒為爾轉頭朔漠邊塵圍騾裹驢盡羞死
寒冰朔雪徒步趨當時客夢知何如二百年後看畫圖
令人感惻長嗟吁

過蘭亭有感

東晉風流安在哉烟嵐漠漠山崔嵬衰蘭無苗土花盛
長松落雪孤猿哀滿地斜陽似無主昏風不獨黃鸝語
當時諸子已寂寥真本蘭亭在何許歌簷老樹綠女蘿

欽定四庫全書

竹齋集
卷下

五

崩崖斷壁青相磨舊時觴詠行樂地今日魚鼓瞿曇家
荒林晝靜響啄木曲水潺潺似山哭游人不來芳草多
習習餘風度空谷去年載酒誦古詩今年拄杖讀古碑
年年慷慨入清夢何事俯仰成傷悲故人不見天地老
千古溪山為誰好空亭回首獨淒涼山月無痕修竹小

有感吟

昨宵風雨多新愁亂無數洛陽城西富貴家舊時臺榭
今何處枯藤古樹棲老鳥敗垣荒草藏狐兔好花不見

春風開落花盡逐春風去遊子意何如蕩子情何訴但
見金谷流映帶郵亭路三月四月杜鵑啼往來客旅心
悽迷落日淡孤雲低不如買取數斗酒浩飲長歌高拍
手一醉之後吾何有世事紛紛付芻狗

欽定四庫全書

竹齋詩續集

明 王冕 撰

按是稿初分為四遺失迨半七言律詩山樵
記臆默為手書五言絕七言絕一無從考於
梅之品題常多傳入畫中故不錄好事者傳
誦不少置因舉一二備夫缺畧滄海遺珠光
彩終焉呈露適爾全藁可致尚當采而補入
諸甥暨陽駱居安等敬書

欽定四庫全書

竹齋集
卷續

七言絕句

素梅

大庾嶺頭春似海不是尋常白玉堂昨夜護龍河上看
一天明月四簷霜

樹頭歷歷見明珠底用題詩問老逋且買金陵秋露白
小舟載月過西湖

江南雪消春漸回溪東溪西梅花開幽人作詩興不淺
時復杖藜携酒來

歲寒風致少能解
野草安能識此情
春到玉堂渾不覺
清香踈影自分明

五雲縹緲隔蓬萊
仙子吹簫月下回
轉首不知春幾許
霜花如雪滿瑤臺

江南十月春色早
處處梅花當水開
玉笛一聲霜不小
滿天明月鶴飛來

羅浮月白海無塵
玉樹瓊林處處春
半夜禹陵風雨作
屋梁飛動欲生鱗

欽定四庫全書

竹齋集
卷續

二

鏡石心腸滿面霜
歲寒吾計未全荒
相逢休問春何處
定是調羹到玉堂

不向羅浮問醉仙
笑呼孤鶴下吳天
春風吹散梅花雪
香滿西湖載酒船

玉雪玲瓏瘦影重
不同桃李媚春風
十分清致無人解
猶在舊家池館中

寒枝錯落凍不解
隔水清香招得來
午夜風停雪聲墮
梅花開盡不知寒

斷雲流水孤山路
看得春風幾樹花
騎鶴歸來城郭是
月明簫管起誰家

昨夜朔風吹
倒人梅花枝上
十分春老夫高卧石牕下
贏得清香入夢頻

朔風吹冷過山
城中子峰頭雪未晴
十載西湖閒客夢
夜來山月最分明

羅浮山下雪三尺
白玉堂前春幾分
歲晏歸來詩思好
東風吹散一溪雲

欽定四庫全書

竹齋集
卷續

三

疎花粲粲照寒水
瑤坡前春獨回
却憶去年風雪裏
吹簫曾棹酒船來

天寒江國霜如雪
草木無情盡摧折
不知春意到江南
疎影橫斜半牕月

春風處處競繁華
桃李無言亦好花
獨有高人愛高潔
肯衝冰雪到山家

平生固守冰霜操
不與繁花一樣情
歲晏溪頭春意足
是誰看得最分明

疎籬瀟洒綠烟寒老樹鱗皴艾葉攢昨夜天空明月白
一枝疎影隔牕看

春風一笑玉無垠雲散空牕見月痕半夜鶴歸詩思好
清香吹滿水南軒

月明曾過西湖路愛看橫枝當水斜試問玉堂諸學士
幾時清夢到山家

明月滿天霜氣重梅花風韵更清妍鶴飛不帶簫聲遠
春過西泠第二船

欽定四庫全書

竹齋集
卷續

霜花浮影月娟娟春色無痕上畫船轉首西湖風景異
不知誰識老逋仙

吹徹瑤笙鶴未還小橋流水碧潺潺夜深夢醒推牕看
白月無痕雪滿山

鵝州城東古梅樹鱗甲滿身如老龍冷霜極冷欺不得
春風吹作玉玲瓏

記得西泠春色歸珠星壁月景離離近來消息真堪笑
却說梅花不要詩

開遍南枝又北枝春風於我似相知酒邊漫說羅浮夢
忘却瑤臺月下時

十月中原風景別寒冰如地雪漫天相逢盡說江南好
處處梅花壓酒船

溪谷冰霜春到遲老夫長夜只吟詩憑誰說與中朝士
此是江南第一枝

瑤瑤坡前春未來幾番空棹酒船回西湖今日清如許
一樹梅花壓水開

欽定四庫全書

竹齋集
卷續

五

瀟灑山林慣雪霜不同桃李競芬芳何緣作得春風夢
一夜吹香到玉堂

此心如鏡蘊陽和不得春風也自花何自高人愛瀟灑
夜深踏雪到山家

鏡石心腸冰雪顏逢時亦有好看玉堂可有青檀舊
不畏風霜入骨寒

千年萬年老梅樹三花五花無限春不比尋常野桃李
只將顏色媚時人

霜氣橫空水滿川
梅花枝上月娟娟
却思前載孤山下
半夜吹簫上畫船

夜來漫踏前村雪
雪裏梅花認得真
回首中原天萬里
瓊林玉樹一般春

一樹橫斜白玉條
春風吹亂雪飄飄
孤山老却林和靖
多載笙歌過六橋

瘦鏡一枝橫照水
疎花點點耐清寒
雪晴月白孤山下
幾度清香拄杖看

欽定四庫全書

竹齋集
卷續

六

今日開門見遠山
鍊師壇下列清班
看來都是梅花樹
箇箇春風玉佩環

樹陰如屋霧如潮
淺水流花落野橋
忽憶去年秋八月
玉霄峰頂夜吹簫

仙子歸來夜未央
瑞香風動翠羅裳
月明無處韜清影
簫管迎春上玉堂

海雲初破月團團
獨鶴歸來夜未闌
一片笙簫湖水上
玉妃無語倚闌干

雲間古寺陸機宅草木蕭森鶴不來惟有溪頭老梅樹
霜花猶是舊時開

三月春風吹雪消湖南山色翠如澆一聲羌管何人見
無數梅花落野橋

閒花野草鬪青紅一着冰霜掃地空惟有老梅標致別
歲寒時節自春風

地老天荒儘可花不同桃李競繁華要知鬲角調羹味
須問舊時丞相家

欽定四庫全書

竹齋集
卷續

七

和靖門前雪作堆多年積得滿身苔疎花箇箇團冰雪
羌笛吹他不下來

墨梅

老仙醉吸墨數斗吐出梅花箇箇真相見莫嫌顏色異
山林別是一般春

面皮如鏡慣風霜烏肯托根桃李塲轉首江南春似海
一聲簫管月蒼蒼

我家洗硯池頭樹箇箇花開淡墨痕不要人誇好顏色

只留清氣滿乾坤

莫厭緇塵染素衣
山間林下自相宜
玉堂多少閒風月
老子熟眠殊不知

紅梅

夢回詩思不可遏
赤脚溪頭夜踏冰
忽地風來明月動
彩鸞飛出碧雲層

顏色雖殊心不異
漫隨時俗混繁華
清香吹散乾坤外
不是尋常桃杏花

欽定四庫全書

竹齋集
卷續

老梅標致何瀟灑
不與尋常草木同
可笑燕山人事別
春風只看杏花紅

翠華影轉宜春苑
苑裏紅梅一夜開
學士賦詩承賜宴
內官傳道着緋來

和羹風致誰能解
箇箇花開耐歲寒
五月燕山木黃落
相逢只作畫圖看

白日遲遲照牕戶
深院不知春幾許
紫簫聲轉香風回
隔簾踏動燕脂雨

十二闌干一院花春風猶憶舊京華翠雲不隔西湖路
夢入咸平處士家

洞天窅窅無人到白日丹光出樹林仙子竟忘食玉法
笑迎春色綠雲陰

彩鳳穿花啄石苔玉牕瓊戶紫烟開山人不說羅浮夢
却憶玄都觀裏來

桃杏漫山總粗俗舊家池館尚春風道人不作羅浮夢
坐看珊瑚海日紅

欽定四庫全書

竹齋集
卷續

九

山林養得寸心丹豈是清香不耐寒今日春風好顏色
任他自作杏花看

玉妃步月影氤氳宴罷瑤池酒正酣半夜不知香露冷
春風吹夢過江南

昭陽殿裏醉春風香隔瓊簾映淺紅翠袖擁雲扶不起
玉簫吹過小樓東

羅浮仙子醉春風玉骨冰肌暈淺紅一味清香消不盡
幾回飛夢錦雲中

仙子歸來逸興賒夢中猶說舊繁華春風轉首情何已
却向江南認杏花

仙子雲中駕鶴歸翩翩霧佩曉風吹玉肌輕染燕脂色
恰似羅浮夜醉時

滿湖水色淨娟娟正是春風二月天醉後不知雲入屋
燕脂飛雨墮樓船

玉骨清癯怯素粧春風一醉九霞觴綠房午夜嬌雲煖
不夢梨花夢海棠

欽定四庫全書

竹齋集

十

昔醉西湖處士家酒痕吹上水邊花東風映蝶迷香夢
一樹珊瑚月影斜

五言絕句

梅花

林下見清真草衣如野人開花水雪裏豈是不知春

二

清苦良自持忘言養高潔夜靜月明多開門滿山雪

三

十月霜風寒山木俱摧折獨此冰玉姿照影清溪月

四

故人江海去相隔萬重雲歲晚思無已梅花可寄君

五

何處尋春信江南路渺漫夜深山月白踈影隔牕看

六

老幹瀆瀆霜寒梢掛新月徐徐暗香來可是春機泄

七

欽定四庫全書

竹齋集
卷續

十一

踈枝照清淺一見興何饒記得春風夜題詩過斷橋

八

仙子步輕盈泠泠玉佩聲羅浮烟水遠詩夢不勝情

九

冷艷凝輕露清香度晚風如何冰玉質却學小桃紅

十

深院春無限香風吹綠漪玉妃清夢醒花雨落燕脂

十一

湖上春何在羅浮夢已空清香入書屋不是杏花風

十二

庭院春日避風回翠鸞舞誰倚玉闌干搖動燕脂雨

十三

不作桃李態山林別是春但令心似鏡何慮惹緇塵

十四

面墨已無情豈但心如鏡昨宵踈影橫空山半牕月

六言三首

欽定四庫全書

竹齋集
卷續

十三

肯同凡卉爭妍自與高人索笑他年鬲鷓調和不改山

林節操

瀟洒托身溪谷清高不染紅塵數點幽花的皜包藏萬

斛陽春

不同楊柳爭妍冷笑托根泉石歲寒寄語高人可問調

羹消息

七言長句

朔風吹撼處士廬凍雲隔月天模糊無名草木混色界

廣平心事今何如梅花荒涼似無主好春不到江南土
羅浮山下蘼蕪烟瑤坡前荆棘雨相逢可惜年少多
競賞桃李誇豪奢老夫欲語不忍語對梅獨坐長咨嗟
昨夜天寒孤月黑蘆花捲風吹不得觸髻夢老披蒙茸
黃河萬里無顏色老夫瀟洒歸巖阿自鋤白雪栽梅花
興酣擊劍長嘯歌不問世上官如麻踈枝錯落花燦爛
正似推蓬溪上看凍痕不剝五更霜蘚色猶存百年榦
孤山處士詩夢寒羅浮仙人酒興闌天荒地老行路難

欽定四庫全書

竹齋集
卷續

十三

誰傳春色來人間君不見江南物色今匪昔大谷長林
盡荆棘歲寒何處論襟期坐對雲山空歎息東樓女兒
白苧歌西樓美酒喚杏花總有高人愛高潔踏雪誰肯
來山家老我無能慣清苦寫梅種梅千萬樹霜清月白
夜更長每是狂歌不歸去只今潦倒霜鬢垂世情恬澹
俱忘機讀書寫字两眼眇斷白搔墮隨花飛轉首江南
隔塵土白月流光雙鶴舞一聲羌管過南樓缺石心腸
亦悽楚安得喚起陳元龍長船滿載玻璃紅浩歌拍拍

隨春風大醉驚倒江南翁

又

江南十月天雨霜人間草木不敢芳
獨有溪頭老梅樹面皮如鏡生
光芒朔風吹寒珠蕾裂千花
萬花開白雪彷彿瑤臺羣玉妃
夜深下踏羅浮月銀鐙冷然動清韻
海烟不隔羅浮信相逢漫說歲寒盟
笑我飄流霜滿鬢君家白露秋滿缸
放懷飲我千百觴氣酣脫穎恣盤礴
拍手大叫梅花王五更窻前博山冷
么鳳飛鳴酒初醒

欽定四庫全書

竹齋集
卷續

十四

起來笑揖石丈人門外白雲三萬頃

又

朔風吹寒脫繁木石溜潺潺出空谷
荒村野店少人行獨有寒梅照寒渌
玉質燦燦無纖埃春風不來花自開
平生清苦能自守焉肯改色趨樽壘
我與梅花頗同調相見相忘時索笑
冰霜歲晚愈精神不比繁華易凋耗
長安多少騎馬郎尋芳競集桃李場
東家買酒西家嘗引得世間蜂蝶忙

又

昔年曾踏西湖路巢居閣上春無數雪晴月白影精神
瑪瑙坡前第三樹虬枝屈鍊交碧苔踈花暝送珍珠胎
初疑羣仙下廖廓瓊瑤玉珮行瑤臺又疑幽人在空谷
滿面清霜鬢華綠迎風冷笑桃花紅綠紛紛太麗俗
今年來看秦淮水路隔西湖一千里草堂上是白雲窩
夜半松風喚子起青山隔世無游塵雲根粉壁光如銀
長嘯一聲月入戶孤山處士來相親江南梅花自有主
欽定四庫全書

竹齋集
卷續

十五

梅先生傳

先生名華字魁不知何許人或謂出炎帝其先有以滋味干商高宗乃召與語大悅曰若作和羹爾為鹽梅因命食采于梅賜以為氏梅之有姓自此始至紂時梅伯以直言諫妲己事被醢族遂隱迨周有標有始出任其實行著於詩垂三十餘世漢成帝時梅福以文學補南昌尉上書言朝廷事不納亦隱去變姓名為吳市門卒

云自是子孫散處不甚顯漢末綠林盜起避地大林大將軍曹操行師失道軍士渴甚願見梅氏梅聚族謀曰老瞞垂涎漢鼎人不遑之吾家世清白慎勿與語竟匿不出厥後累生葉葉生萼萼生榮榮生華是為先生先生為人修潔灑落秀外瑩中玉立風塵表飄飄然真神仙中人所居竹籬茅舍洒如也東西行者過其處必徘徊指顧是梅先生之居勿剪勿除溪山風月其與之俱乎先生雅與高人韻士遊徂徠十八公山陰此君輩皆

欽定四庫全書

竹齋集
卷續

十六

歲寒友何遜為揚州法曹掾虛東閣待先生先生遇之甚厚相對移日留數詩而歸唐丞相宋璟平生鍊心石腸不輕為人題品獨為先生賦之其見重如此天寶大厯間杜甫客泰山邂逅風雪中巡簷索笑遂為知心每語人僕在遠道無可人與語得梅先生少慰焉甫為一代詩宗心所賞好衆口翕然於是先生之名聞天下清江成都羅浮庾嶺孤山石亭野橋溪路之濱山店水驛江岸之側遇會心處輒婆娑久之好事者爭攀挽過其

家甚至圖寫其象朝夕瞻玩或以油牕土屋屈致先生
將之射利先生亦為開心吐露人為先生嘆非其所先
生曰苟不盤根錯節安能以別利器知先生者敬愛愈
重錢塘林逋眉山蘇軾咸以詩歌美之蓋凡欲以片言
行者必託先生藉口苟非先生之為容則語言無味百
世之下聞其風而高之王沂公曾居要路持魁柄高下
人物許在百花頭上繇是緋綠累累至于今不墜先生
性孤高不喜混榮貴以酸苦自守忽一夕聞高樓羌管
聲乃悽然有感吾不能學桃杏輩趨時故際窮年風饗
雪虐零落如此奚憾焉嗚呼梅自大林之後曠數百載
無聞人由唐至宋稍流派蕃衍分南北兩支世傳南暖
北寒先生蓋居於南者也先生諸子甚多長云實操行
堅固人謂有父風味異居南京犀浦者為黃姓其餘別
族具載石湖世譜太史公曰梅先生翩翩濁世之高士
也觀其清標雅韻有古君子之風焉彼華腴綺麗烏能
辱之哉以故天下人士景愛慕仰豈虛也耶

送僧住院

愛名山入剡便須擲鉢錫高飛傳臨濟正宗底用着金
毛大吼佛至於今我輩何如嘆鳳凰不似鷓鴣看款段
貴於騏驎只合隨緣去住無勞較論短長某雪月襟懷
據天寧第一座虎嘯風生遊湖上二十年到這裏張其
綱紀施于禮義豈在大小之殊自可等倫迴絕光輝
蓮社振作吾宗四時錯行有冬有夏日月代明有晝有
宵草堂昨夜雨初乾今日南山翠相亞葫蘆藤上忽結甜瓜韭菜
根頭新生苦蕒有樹無花無花有果何者是真何者是
假草露水光電生石火你問何如我道恁麼咄鮎魚跳
上竹竿頭胡孫睡在崩崖下看他只是尋常惡

邵澤步渡船疏

泌浦湖納百川源流乃東南溪山之臟腑邵澤岸通三
江潮汐入西北水道之咽喉正當十字路頭豈比三家
村裏往來客子常懷不測之憂貧賤農人每起有餘之
念架飛梁難尋巨木造扁舟不費多錢富長者若用心

機小梢工何辭氣力白浪港中平地過底須問水淺水
深綠楊陰裏便撐來何必論天昏天曉

欽定四庫全書

竹齋集
卷續

十九

竹齋集卷續

故山樵王先生行狀

山樵諱周字師文其先關西人系出猛之後十世祖德元仕宋官至清遠軍節度使靖康播遷留守建康移鎮浙東未幾仍守建康策勲追贈太師威定公威定之子諱琪閬州觀察使廟賜忠節偕武節大夫第三子也第八子某諸軍統制教練使居諸暨勅葬長寧小溪山是為諸暨初遷之祖孫文炳割田園山業頃畝凡若干資之慈光梵刹香火焚修族屬蕃衍世有聞人曾大父來

欽定四庫全書

竹齋集
行狀

清白傳家隱居善積多聞考山農先生性資豪邁馳聲區宇間山樵幼穎悟六歲通論語孝經大義少長過目即成誦侍父山農先生經涉河山之美迨乎文物之盛克廣心志造詣益深至正甲午來元運日促移家九里山中種蒔梅竹從容後先國朝兵下衢婺山農建長策期至太平天竟奪其算區宇再造既述職方肇修先緒占籍會稽簞瓢陋巷人不堪處賡歌擊節其樂也愉愉數竒偕寡達生自分寫梅師法家傳溪橋斷岸老幹踈

花吟歎盤礴顧瞻忘返人目其迂落筆伸紙神領意會
不知生意自毫端出迄今世家蓄名畫購之有不可得
殆若古今治忽山川經由辭藻賡唱扣之若河決若燭
照赫如前日事論辨精剴人無一辭可更學宮鄉飲推
讓賓席士類耆儒尊仰郡守以下風采景慕禮遇接見
優加作作尚平淡直而婉簡而奧藁藏於家平生清淡
自將觀化之日口占一絕云清風明月今宵好相伴逋
仙老鶴閑瞑然而逝其孤昭念塚上未有石介姻友駱

欽定四庫全書

竹齋集
行狀

氏則民行實為請余家居連閭巷山樵為執友行次感
舊懷今論次有自山樵生于元至正乙亥秋七月二十
二日卒于永樂丁亥正月十三日以疾終于正寢壽七
十有三配周氏世家蕭邑鄉曰昭鴻有賢行先卒子男
即昭孫男長璵任建寧府學訓導次驥騏驎孫女永
貞適諸暨駱大年孫曾繩絕家學源源習熟葬用明年
夏四月二十一日卜地鄉香爐山之原配周氏合祔嗚
呼山樵君子儒也阨窮而守益至持操而志益充衣冠

偉望處鄉里恂恂然遵養時晦不忤不求人孰不為致
重乎立言君子揭銘擣光導揚潛德納諸玄堂庶傳永
久六大理左少卿致仕山陰呂升狀

欽定四庫全書

竹齋集
行狀

三

書竹齋先生詩集後

竹齋先生詩集者諸暨駱稱大年之所彙粹者也先生世諸暨人名冕字元章竹齋其別號豪放不羈士也其為人槩具學士宋公所撰王冕傳謂馬不覈駕不足以見其竒才冕亦類是夫子又聞之先生善寫梅自成一冢其法則出入楊無咎平生愛讀周禮探其微嘗著書一卷曰吾不死持此遇明主伊呂事業不難致也值元季視時政不綱負氣懷憤則出言無所顧忌率多譏刺

欽定四庫全書

竹齋集
後序

其任事之人致人目之為狂豈真狂者哉走四方其足跡殆半天下志無所遂迨謁太祖高皇帝于金華與語頗合獲留餉午具惟飯一盂蔬一盤先生且談且食盡飽乃已拜上喜曰先生能甘粗糲如是可與共大事即授以諮議叅軍未幾遘疾遽亡知之者謂使天假之以年其樹功烈當不在元勲之下是知其詩為先生餘事耳况其大篇短章豪雄俊偉汪洋浩瀚酷似其為人故誠意伯劉公嘗序其集曰其言有忠君愛民之情去惡

拔邪之志懇懇悃悃見於詞意之表誠得先生之心者也其集甚富惜厄兵燹不全其今年所集僅能收拾於煨燼殘缺之餘蓋千百而什一也是則先生之手澤尚存亦可謂之不死矣大年實先生之曾孫壻端愿謹慤有文有藝子三人居安居敬居恭亦讀書尚禮稱其家兒談者謂其父子所得皆出於尊人溪園先生之教溪園今年幾九十篤厚君子博學能文嘗出粟助有司賑恤貧困奉璽書旌為義民以彙粹是集不沒先生之

善而觀亦駱氏義舉之一端云溪園名象賢字則民故併識之資善大夫南京吏部尚書致仕蕭山魏驥書

書竹齋先生詩集卷後

是集之傳實先生曾孫壻駱大年之所自也大年端介
愿慈儒素自居雲栖乃別號婦王字永貞從大父山樵
翁筭而命之壺彛素率配德警誡無違子三人長居安
次居敬居恭閑習詩禮雍雍氣誼之間居敬梅之墨妙
亦精其尊人溪園先生博學擅古文辭山樵為忘年交
遺稿刊刻深切于衷溪園嘗輸粟貸貧民奉旨以義民
旌淑預光祿酒饌采輯諸暨志工費毋溷於人書成大

欽定四庫全書

竹齋集
後序

家贄見具醴醑悉拒絕之狷介若是非義而何逮若婦
王保佑其家世其竹齋遺藁輔相克觀厥成行無攸遂
賓敬有儀重山樵十年乃字之得人竹齋襟懷曠絕矯
時慢物嘗曰士生天地間苟不以道德功名顯亦當文
翰傳後何得生無益而歿無聞焉諸孫武昭克能佩服
斯訓凡諸述作無不記憶叩之朗然成誦慨古懷今蕭
然吟詠自若明日鐫無粟煮不暇論事殊世異幾及百
年雲栖相謂興起休烈導揚篇簡具載刊置九原可作

平生志願酬矣懲勸風刺措諸言辭之表人得而見矣
詩凡三卷弁諸首簡誠意伯青田劉公基出處詳悉并
載太史金華宋公濂訓導諸暨張公辰傳中子也與王
氏居連里巷山樵為執友行侍席聽講常多重以溪園
文字交好斷金之誼姻親之往來詳于見聞高山仰止
書成渙乎一新因不辭而書之詩曰心乎愛矣遐不謂
矣其斯之謂乎景泰七年歲在丙子二月既望邵人白

圭書

欽定四庫全書

竹齋集
後序

二

居安等謹按外氏家世累膺武功顯擢迨及我外
曾祖父山農先生由儒發身奕葉相仍一畝之宅
清約自處集義養浩聲利一無動於心具載傳序
中俯念吾母極孝慈撫諭我兄弟嘗曰我先世竹
齋遺稿必將鐫刻酬我祖父志顧歲月于邁因循
何哉幸我堂上垂白之祖昔與我外祖父山樵先
生締交推及是心為心中命於下吾父厥志順承

居安 日與諸弟 居敬居恭 校讀刊詳芳聲麗澤從

欽定四庫全書

竹齋集
後序

容乎其間樗散之木因山之高百尋可致顧 居安
等學業無成揚名顯親徒切于懷又無從倣昔人
成其宅相之榮自勉自顯中焉忸怩詩分三卷從
遺藁編次未備者期之采補書板收藏來者時加
局鑰勉旃工墨之費日廣其傳當與士君子共之
諸孫駱 居安 等百拜謹書